

طلق مراتك تحبها أكثر

تأليف

ميادة عابدين



اسم الكتاب/ طلق مراتك تحبها أكثر

الكاتبة / ميادة عابدين

الطبعة الأولى 2019

تصميم الغلاف : أحمد الشامي

المراجعة اللغوية : سامح سرور

رقم الإيداع : 2019/19241

الترقيم الدولي: 9 - 51 - 6727 - 977 - 978

التصنيف: امرأة

الناشر : السعيد للنشر والتوزيع

المدير : لمياء السعيد

برج الهادي - الدور الأول - 36 ش عبد الحميد الديب - شبرا مصر

01550096215 - 0222017260

elsaidpublisher@gmail.com



﴿ إهداء ﴾

إلى أمى وأبى

إهداء إلى كل من يحاول المحافظة على إنسانيته فى ظل ماتحتوي

عليه الحياة من نفوس مشوهة وغير آدمية

إهداء إلى كل من حاول أن يشجع قلبي ويثبته

إهداء أيضا إلى كل من حاول التقليل والإحباط لأن كل هؤلاء من

أعطوني ثقة البداية والإستمرارية

◀ المقدمة ▶

تخيل كدا مراتك تصحى كل يوم على غيار الريق تديلك قلمين وبوكسين وشلوطين، وده يبقى بمثابة الفطار اليومى المعتبر لحضرتك، ها؟ تخيلت؟ .. طيب أستاذن أنا .

تخيل كدا بعدها آجى أسألك عن إنسانيتك، فتدور عليها فى جيبك وماتلاقيهاش أو تلاقىها حمضت، ها؟ تخيلت؟ .. ياخسارة دى كانت حاجة مفيدة قوى بس للى كان بيستخدمها يالا خيرها فى غيرها، أستاذنك أنا بقي علشان مستعجلة.

تخيل كدا إنها تعملك محضر علشان تمشيك عالعين وأنت برضه تلخبطه، ها؟ تخيلت؟، تستاهل على فكرة، ماهو اللى بيقدم السبت بيلاقى باقى الأسبوع ولا مؤاخذه.

طيب تخيل إنك تحرشت بيها، فتقوم هى تتحرش بيك فى ساعتها على طول، ماهو البادى أظلم، ها يابنى تخيلت ولا إيه؟، طيب أقوم أجرى بسرعة أنا.

تخيل كدا تبقي ماشي تلف فى الشوارع علشان حد يشتريك
صاحب أصيل وتطلب منهم وتقول لهم ممكن تشترولى صاحب؟
وهما يردوا عليك بماكانش يتعز، ها؟ تخيلت؟ .. طبعاً كلنا
تخيلنا مش هو لوحده.

تخيل لما تقول لعيالك أبوكم مات وشبع موت، فالناس
تقولك لم مراتك أحسنك، تخيل الموضوع ده لوحدهك وأجيك
بعدين دى أمور عائلية مش عاوزة أدخل فيها.

تخيل كدا أقولك إالحق المعلى قبل ما يخلص وماتتبطرش،
واحمد ربنا إن فيه حد يمعلىك لحد دلوقتى، تقولى لأ دى
مستفزة جدا، خلاص ياعم براحتك ماتزوقش.

تخيل كدا لما ابنك يقولك زهقتنى بروح أمك ياراجل يانص
لبه، ها؟ تخيلت؟، لأ كدا الموضوع خرج عن السيطرة الحقيقة.

هى قالت له هو أنت راجل؟ دا سوق العرسان انضرب، أنا
عاوزه مشاعر يا عبصدا المطلب، ولا هاتطلقنى بالرز أبو لبن؟
أقولك على حاجة حلوة؟ لما تلاقي ماسورة الستات انفجرت..
طلقها .. هتحبها أكثر .

أسيبكم تتخيلوا على مهلكم وأستأذنكم أنا .

أفعدوا بالعافية

ميادة عابدين

﴿لم مراتك﴾

واخذلى بالك إنت:

فبعد الفحص والمحص والتمحيص ظهرت النتيجة الحقيقية
والمهمة.

إحنا مجتمع بنكافىء «المتحرش».. أيوه بنكافؤه، واحد هيرد
يقول لى جرى إيه يا أبله بنكافؤه إزاي إنتى بتخرفى ولا إيه؟!
هقول له لأ مابخرفش .. زى ما بقولك كده يا أسطى إبراهيم
بنكافؤه، إدينى فرصة طيب أفهمك.. ولا تفهمينى ولا أفهمك
امشى من قدامى الساعة دى.

الست «فوزية» هى كمان مش عاجبها الكلام، مصمست
شفافيفها وقالت هو فى إيه يا أختى ما تعقلى الكلام قبل ما
تقوليه، حلمك عليه بس يا ست الكل هشرح لك حالا أهه، يا
أختى ولا تشرحيلى ولا أشرح لك، إشرحى لنفسك أنا مش فاضية

لكلامك اللى يموع النفس ده .. أقوم أعمل لقمة للرجال بدل ما
تقليلى دماغى، قال بنكافىء المتحرش قال.

أيوه إحنا مجتمع بنكافىء المتحرش وبنشجعه وبنصقف له
كمان.

بنشجعه لما بنهاجم الضحية وبدل ما نبقى فى صفها بنقلب
الدنيا كلها ضدها وكأنا بنعاقبها على ذنب ارتكبه.

بنشجعه لما بنسب الكارثة الحقيقية اللى هى التحرش
بالأثى، ونمسك فى الحاجات التافهة اللى زى «كانت لابسه إيه؟
وماشيه إزاي؟».

بنشجع المتحرش لما نقول للضحية إيه اللى بيخرجك الشارع!
ما تقعدوا فى بيوتكم بدل ما تقلبوا لنا دماغنا كل شوية، وكأنا
بتقول لها «استحملى بقى اللى يحصل لك طالما ارتضيتى إنك
تخرجى من بيتك علشان تتعلمى أو تشتغلى أو تمارسى طموحك
وكإنها بتتعاقب على ممارستها لحياتها الطبيعية».

شجعنا المتحرش يا ست فوزية لما قعدتى إنتى وجوزك
تشتموا فى البنت اللى الراجل اتحرش بيها قدامكم فى الأتوبيس
وشوفتوه بعينكم ومحاولتوش حتى تدافعوا عنها لما قررت
تفضحه والناس وقفوا ضدها، مع إن إيمان بتك كل يوم بتركب
الأتوبيس تروح الجامعة وممكن تتعرض لنفس الموقف ومش
هتلاقى اللى يقف جنبها.

شجعت المتحرش يا أسطى إبراهيم لما شفت الراجل اللي اتخانق فى الشارع من أسبوع مع الشباب لما اتحرشوا بمراته وما اتحركتش من مكانك، واكتفيت بإنك تقول ما كان يلم مراته ويقعدها فى البيت أحسن من وجع الدماغ ده.

شجعنا المتحرش لما سبنا القضية المهمة واتكلمنا فى الفرعيات اللي تكسف، شجعناه لما إدينا له فرصة يجح ويقول ما هي اللي لابسة عريان، وهي اللي ماشية لوحدها، وهي اللي ردت عليه لما عاكستها، وهي اللي أغرتنى وهي وهي وهي.

شجعناه لما مابقاش متحرش وبقي شخص عادى بيحب فى سيرة الضحية ويعدل عليها ويغلطها كمان.

شجعنا المتحرش لما خوفنا بناتنا وستاتنا من المواجهة علشان الفضيحة، لما كان قرارنا نلهم بدل ما نلم المتحرش نفسه.

شجعنا المتحرش لما أقنعنا البنت إنها هي الغلطانة واخترعنا لها أسباب وهمية، كانت بمثابة رسائل هامة للمتحرش بنقول له فيها اتحرش كمان وكمان وإحنا فى ضهرك.

كافأنا المتحرش لما بقى الفيسبوك وسيلة مهمة لفضح الضحية واتهامنا ليها بأبشع التهم حتى وإحنا منعرفهاش.

كافأنا المتحرش لما بنسيه حر طليق بيمارس حياته بأريحية، وسجنا البنات والستات جوه سجن الخوف.

مجتمعنا العبرى كافاً وشجع وجامل المتحرش، علشان
خايف من الفضيحة، علشان عارف كمان إن البنت مكسورة
الجناح، وعمرها ما تعرف تاخذ حقها، لدرجة إننا ممكن نصحى
فى يوم نلاقى المتحرشين عاملين جمعية وبيطالبوا بحمايتهم من
البنات اللى عاوزة تاخذ حقها منهم.

نسيت أقول لكم إن بعد الفحص والمحص والتمحيص،
ظهرت النتيجة، ولقينا الحل الأمثل لمواجهة التحرش هو إننا نلم
بناتنا وستاتنا ونرميهم فى بير عميق مالوش قرار.

بقول لكم إيه.. أنصحكم ألا تطالبوا بقوانين تحميكم من
التحرش والمتحرشين طالما ستظل قوانينكم الداخلية تقف فى
صفوفهم وتقدم لهم الدعم بكل خوف وجبن.

﴿أبو كى مات وشبع موت﴾

أبشرك بإنك هاتفضلى طول عمرك بتلعبى فى مخيلتها دور الشيطان اللى حاول يستخدم أسوأ الأساليب اللى تكرهها فيه، هتلف الأيام وهيتقابلوا، وهتبقى إنتى بكل تفاصيلك وتفصيل حكاياتك عنه الذكرى الأليمة اللى هتحاول تنساها، هتعتبرك المسؤولة الوحيدة عن تدمير مشاعرها تجاهه، أصل وقتها مش هتفهم أى حاجة غير إنها اتحرمت منه وعلى إديكى إنتى، مش هتقدر تنسالك إنها كانت زى أى بنت محتاجة له فى أوقات صعبة كتير ماكنش ينفع حد غيره يحل محله فيها، وإنتى استخدمتها طرف فى تصفية حساباتك معاها وبعديتها عنه.

«أبو كى مات وشبع موت، ربنا خلصنى وخلصك منه، مش عاوزه اسمعك بتجيبى سيرته ولا عايزاكى تفتكره تانى، أبو كى مات ومش هتشوفيه طول حياتك أبدا»، قمة القسوة لما يكون ده رد أم على بنتها اللى عندها خمس سنين فى كل مرة، تسألها عن

أبوها، هتسألنى هو الأب عمل إيه علشان تبقى تصرفات الأم قاسية للدرجة دى، هرد عليك وأقول لك أنهم اطلقوا.

اطلقوا؟! تموت الراجل علشان اطلقوا! إيه هو إنت أول مرة تسمع الكلام ده؟ ماتعرفش إن اللي جوزها يطلقها بتموته فى عيون ولاده؟ ماتعرفش إن ستات كتير بيستخدموا الأولاد فى تصفية الحسابات اللي بينها وبين طليقها؟ دول بقوا يخططوا ويتكتكوا علشان يقهروا قلب الراجل وبقت خطة الموت دى أشهرهم وأسهلهم، دى بيتجيب نتائج سريعة وزى الفل.

تخيل كده أم بتربى بنتها على كرهه أبوها، بتأكلها وتشربها كرهه، سيك من إن البنت دى هتكبر بنفسية مختلة أو مشوهة، الكارثة الأكبر إنها فعلا بتكره شخص عزيز على إيد شخص عزيز برضه، ودى بصراحة قمة القسوة، أصل الأم دى مابتقاش عارفة حجم الصراع النفسى الخطير اللي بيبقى جوه الأولاد، خاصة لما يكونوا عارفين إن الأب موجود ومامتش فعلا زى ما هى بتقول، صراع ممكن يجيب نتيجة عكسية وبدل ما يموت هو فى عيونهم تموتى إنتى.

شاطرة قوى وبتقسى قلب البنت على أبوها وبتشربها كرهه، اصبرى عليها كده شويتين لما تكبر وتعرف إنك كتتى بتخلصى تارك منه بيها، وشوفى كده رد فعلها هيكون إيه.

الست من دول تطلق من هنا، وأول حاجة تفكر فيها طريقة الانتقام من الراجل اللي أصبح بالنسبة لها بمثابة العدو، ما

بتلاقيش أسهل من إنها تضربه فى مقتل وتستخدم الأولاد أداة للانتقام الناجح المضمون.

انتقمتى؟ كرهتى العيال فى أبوهم؟ ضيعتى عمرك فى تأليف قصص وحكايات مثيرة تبعدى بيها ولادك عنه؟ مسوطة دلوقتى وطايرة من الفرحة لما احتفظتى إنتى بيهم؟ طيب يا ناصحة أحب أقول لك إنك احتفظتى بأشخاص فارغين من المشاعر لأى حد حتى ليكى، أصل أنا نسيت أقول لك عمرك ما تربي عيال بنفسية سوية وإنتى مشغولة طول الوقت فى استغلالهم لإشباع رغباتك الخابية فى الانتقام.

يا ستى حتى لو شايقة إنه ظلمك وجه عليكى، إحسنى تربيتهم إنتى ولما يكبروا بيعرفوا الحقايق ويقررروا وقتها مين ظلم ومين اتظلم، مش من حقك أبدا تلعبى الدور ده فى حياة ولادك حتى ولو ليكى حق، بالعكس هتبقى أم ظالمة لنفسك وليهم، ربى أشخاصا صالحين يعرفوا ينوا حياة سالحة وما يعيشوش الحياة اللى إنتى عشيتها.

انفصلوا برقى وابعدوا أولادكم عن تصفية حساباتكم، حتى لو فى بينكم مشاكل وخلافات، ما يصحش أبدا ييقوا طرف فيها، علشان وقت ما هيكروها صدقونى مش هيكروها طرف واحد، دول هيستغنوا عن الطرفين.

ربوا جيلا سالحا يقدر يفتكر لكم الخير والحب لما تكبروا، مش يبقى كاره اليوم اللى جبتوهم فيه

◀ (هوانت راجل؟!) ▶

مبدئيا كدا أول مابسمع جملة «أنا الراجل» فى أى نقاش بيجمعنى بأى شخص من مدعى هذه «الصفة» بتأكد على طول إنى هكسب النقاش وإن الشخص اللى قدامى ده عاوز ينهى الحوار «ويجيب ورا» فايستخبي ورا الوضع اللى اتخلق عليه أودى بتبقي أسهل الطرق للهروب وفرض وجهة نظره.

فى البدايه كدا عاوز أبلغ سيادتك ان الصفة دى مكتسبة .. يعنى بتتعب وبتشقى لغاية ماتبنيها وتكبرها وتشوفها صرح كبير كدا بيكبر يوم بعد يوم قدام عينيك، مابتتخلقش بيها زى مانت واهم نفسك، يعنى مش كل الذكور رجال زى مانت فاهم.

الاسطى مرسي دايمما يقول جملة أنا الراجل لست فوزية مراته علشان ينهى أى حوار بينهم لما بيتأكد ان وجهة نظرها صح تحس كدا ياجدع إنه خايف يحسسها إنها بتعرف تفكر .. مرض

بقي والعياذ بالله، والبشمةهندس أشرف جملة أنا الراجل لبانة في بقه بيقولها عمال على بطال للدكتوراة نسمة خطيبته، وهى ياعين أمها مش عارفه تاخذ معاه حق ولا بطال لأن رجولته دايمًا بتهددها بنفسخ الخطوبة، الأستاذ حنفي ده اللي مضحك حبتين دايمًا يقول أنا الراجل للأستاذة عواطف زميلته في الشغل ورأيه هو اللي هايمشى .. وياريت بيقولها على حاجه عدلة، ده بيقي إنهاء حوار هانفطر إيه النهاردة؟ طعمية ولا بتنجان؟، ودايمًا سمير بيقولها لأخته سمر وعماد بيقولها لأمه الست زينب وكأن جملة أنا الراجل دى بيستخدموها كدفاع شرعى عن النفس .

انت الراجل ياسيدى أواحنا مااعترضناش خالص على وضعك وحقك طبعًا تفرح بالمنصب وتستخدمه استخدام يزهقنا ويخلىنا نقدملك واجب الاعتذار علشان بنحملك مسؤولية صفة إنت ماتعرفش حاجة عنها غير اسمها، ومش هنيجي عليك أكثر من كدا علشان انت زى ناس كتير فاكر إنك نزلت من بطن الست والدتك راجل، بس السؤال هنا إيه اللي يخليك تستخدم صفات تجيبلك الكلام؟ واللي هتخلىنى أسالك دلوقتى وأقولك هو إنت تعرف يعنى إيه راجل؟! طيب تعالى كدا نعرف مع بعض إيه هي صفات الرجولة خاصة لما تيجى تمارسها على أيست فى حياتك، وهتفاجىء جدا إنها حاجات بسيطة وسهلة الاستعمال.

حق الرجولة عليك إنك تناقش الست اللي قدامك تديها
المساحة تتكلم وتعبر عن اللي جواها .. كبتك ليها مش رجولة أيا
كان درجة قربها ليك أو بعدها عنك، إنت راجل باحتواءك ليها،
باحترامك لرأيها أيا كان سواء هتاخذ بيه أو لا، راجل يعنى
تحسسها بالأمان معاك مش تبقي دايمًا مهددها برجولتك، راجل
يعنى ماتنيمهاش يوم مكسورة خاطر ولا تحسسها إنها قليلة
ومش مالية عينك، راجل يعنى ماتخونهاش ماتقللش منها حتى لو
بينك وبين نفسك، راجل يعنى تخليها ست الكل بالقول والفعل .

حق الرجولة عليك إنك تخاف تعمل الغلط علشان
ماتجرحهاش، إنك تكون أبواعى ناضح قادر تحتوى، إنك تكون
أخ راجل بالأفعال مش بالصفة اللي اتولدت بيها، راجل يعنى
ماتخوفهاش منك تخليها دايمًا مطمئناك وتلجألك حتى وقت
الغلط، راجل يعنى تبقى لها ضهر وسند حينين مش شخص كل
دوره فى الحياة أنه يقهرها وبس علشان يحس بنفسه .

معلش بقى أنا مش موافقة على إنكل شخص اتولد ذكر
يستاهل صفة الرجولة، اللي مش هایتعب من هنا ورايح ويجتهد
ويبذل أقصى ما عنده علشان يبقي مهيا للصفة دى مانسمعوش
تانى أبدا يزهدنا بجملة أنا الراجل، ولو حاول يقولها من غير
مايبقي مؤهل حقا تردى عليه فورا وتقوليله راجل بأمانة إيه؟!!

نداء إلى كل أب وكل أم لما تيجيو تربيوا ابنكم حاولوا تفهموه
الفرق ما بين الرجولة وبين الوضع اللي اتولد عليه، ونداء آخر
لكل شخص لا يملك صفة «الرجولة» أو مستكبر إنه يتعب عشانها
شوية أحب أقولك إن الرجولة سهلة بس مستاهله وبلاش الجملة
عمال على بطال علشان يبقي شكلك وحش جدا ياعم الطاوس
اللي نافش ريشه

◀ (ضربتی جو نزک النهاردة؟) ▶

طمیننی علیکی أخذتی حقك منه؟ ضربتیه جامد؟ ویا تری ضربتیه إزای؟ ویا یه؟ بالقلم علی وشه؟ ولا بالبوكس في عينه؟ إديتيله علقه سخنة كسرتی بیها عضمه؟ ولا كانت حاجة خفيفة كده؟ طیب قدرتی علیه؟ ماخوفتیش؟ وهاتضربیه كل يوم ولا ده كان مجرد تهویش علشان تفهمیه الصبح من الغلط؟ یا جبروتك یا شیخة ماقلقتیش إنك تجرحی مشاعره؟ ماجاش في بالك إنك لما هاتضربیه بالقسوة دی إحساسه بیکی هیقل وهاتكسری رجولته؟ هو إنتی ماعرفتیش تاخذی حقك منه غیر بالضرب؟/ ماعرفتیش تعبری عن غضبك غیر بالطريقة دی؟ طیب بعد ما ضربتیه اتصرف إزای؟، ارتحتی یعنی؟ هدیتی؟ هاتضربیه تانی وثالث ورابع؟ هیقتی ده رد فعلك الطبیعی علی أى غلط منه؟ إحكي لی بقی فضولی هیموتنی.

أيوه كان في وجع وكسرة نفس، وانهيار نفسى وجسدى، وكانت علقه سُخنة جدا، وكمان مش أول مرة، ده أنا طول عمرى كده، بس هما اللي بيضربونى مش أنا اللي بضرِبهم، إنتى فهمتى إيه؟ ولا إنتى سمعتى حكايتى غلط؟ سمعتى اللي كان نفسك يحصل، كنتى عاوزة واحدة مننا تاخذ لك حقك، من جوزك اللي هراكى ضرب ومن أخوكى اللي كانت إيده سابقة لسانه معاكى ولا أبوكى اللي كان أسرع رد عنده في التفاهم معاكى هو مد الأيد؟

أخوها له الحق يكسر عضمها، مش يضربها بس حتى وهى على ذمة راجل، وجوزها له الحق برضه يضربها ويموتها ضرب لو غلظت، قمة القسوة لما يكون ده رأى الست صباح فى حكاية أميرة بنتها اللي جوزها دايمًا بيضربها على أتفه الأسباب، كان رده الوحيد لغلظها أو توجيهها الضرب المبرح، ماكانش حتى بيتناقش معاها، كان فاكر إن الرجولة والسيطرة فى عضلاته وقوته الجسمانية اللي بيستقوى بيها عليها وهى لا حول لها ولا قوة.

قمة الإهانة لما تلاقى إن تأييد قرار الضرب وتكسير العضم جاى من واحدة ست، واللى ماكتفتش بضرِب جوز بنتها ليها، لأ دى هددتها إنها هتبعث لها أخوها يكمل عليها لو ما مشيتش تحت طوع جوزها.

إنتى ماجاش على بالك يا ست صباح إذا كانت بنتك فعلا بتغلظ ولا لأ؟ وحتى لو بتغلظ غلظها ده يستحق الضرب ولا لأ؟ إنتى

فكرتى في إيه؟ وليه جوزها يضربها وأخوها يكمل عليها؟ هي مش جماد على فكرة دى إنسانة بتحس لو ماكتوش فاهمين أو مصدقين.

ضربتها وإنت عارف إنها مش هتقدر ترفع إيديها وترد لك الضربة لأنها ست، وماينفعش فى عرفنا طبعاً ست تضرب راجل، ضربتها وأهلها بيشجعوك .. لأ وكمان بيعتوالك أخوها وأبوها يكملوا المرمة، ضربتها وإنت ضعيف، أيوه ضعيف لإن الراجل الحقيقى عمره ما يستقوى على ست.

إوعاك تقول إنها استفزتك، ما إنت ياما بتستفزها، رفعت إيديها في مرة من دول ورزعتك بالقلم على وشك مثلاً؟ هتقول ما بتسمعش الكلام هقول لك ما إنت ياما كسرت بخاطرها، قدرت في مرة تجيبك من شعرك وتمسح بيك البلاط؟

عارف إنت بتعمل فيها إيه لما بتضربها؟ بتفضيها من جوه بتخليها خالية من المشاعر، من الحياة بتجردها من أنوثتها، بتخليها شبح عايش معاك بس بجسمه اللى إنت شوهته من كتر الضرب.

عمرك فكرت تحتويها، تاخدها في حضنك، تهديها، تططب عليها، يا أخينا الست دى كائن ضعيف جداً أيا كان جبروته، وما بقصدش بالضعف ده إنها ماتقدرتش تشيل مسؤلية لأ أقصد إن الكلمة الحلوة بتخلي قلبها يلين في ثانية، عمرك فكرت في مرة تشغل مخك معها تحاول تشوف إيه اللى مضايقتها وتحله بهدوء، ولا الحاجة والدتك ربتك على تشغيل الإيد قبل الدماغ؟.

جبروتك وقلة عقلك بيخليك تضربها وإنك عارف ومتأكد إن كل اللي حواليك بيحموك، بس خلى بالك إن حبها ليك بيقل، خوفها عليك بيتتهى، احترامها ليك مايبقاش ليه وجود، من النهاية كده بتفقد رجولتك وشخصيتك قدامها.

لما تيجى تعاقب مراتك عاقبها بالحاجة اللي تقومها مش تاذيها، عاقبها بالطريقة اللي ماتفقد هاش روحها وأنوثتها، إوعى تكسر نفسها بالضرب، الضرب بيخليك قليل جدا فوق ماتتخيل، ماتخليهاش تبقى نايمة ومن قلبها بتدعى عليك.

مستحيل أبدا ست تفكر تمد إيديها على راجل، لإنها عارفة إن التصرف ده هيهينها قبل ما يهينه، ولا عمرنا اتمينا ده غير في خيالنا البريء اللي بيبقى نفسه يوجع أى إيد إتمدت علينا بالضرب مش بالطبطة والتوجيه.

ماتخليش حد يضربك، ولا تسمحي لحد يهين جسمك أو أنوثتك، ولو إيده سبقت عقله معاكى ردى عليها بعقلك اللي هو فقهه مش بإيدك اللي هتهينك قبل ما تهينه، صدقيني مرة فى الثانية هايترب من إصرارك على ردعه.

اللى يصعب عليك بقى يا أخى ويخليك مش قادر تفهم اللي بيحصل، إن قرار تأييد الضرب والاعتماد عليه كوسيله للإصلاح والتقويم بييجى من ست

﴿ (اعملى له محضر) ﴾

ريحى روحك واعملى له محضر، إنتى لسه هتبصى لى وتتخضى؟ أيوه زى ما بقولك كده، هتروحي القسم وتعملى له محضر بعدم التعرض، وبكده هتبقي مسكتيه من إيده اللى بتوجعه وتعيشى حياتك وإنتى سلطانه زمانك ولا هيقدر يبجى جنبك بعدها أو يقولك حتى ثلث الثلاثة كام.

هما كده الرجالة ما بيجوش غير بالعين الحمراء، تأديبهم يتأدبوا معاكى، وطول ما هو عايش معاكى وهو مُهدد هايمشى معاكى زى الألف، اشترى منى كل الكلام ده عن تجربة، أنا عملت لجوزى محضر من ستين علشان شيطانه وزه وكان طول اليوم يا اختى يعلى صوته عليه ومعيشنى فى نكد، قولت فى عقل بالى أنا لسه هستنى لما الأمور تطور معاه ويمد إيده عليه؟ مكذبتش خبر وسمعت بنصيحة أمى وروحت عملته محضر وقولت فيه إنه

مصباحنى بعلقة وممسينى بعلقة ومدمر نفسيتى خالص، ومن ساعتها ما أقولكيش ما بسمعلهوش صوت فى البيت أبدا.

قمة الرعب لما تلاقى إن دى نصيحة «الست سعاد» لجارتها «الست نادية» اللي جوزها معيشها على طول فى غم، «الست نادية» كانت بتشتكى لجارتها من تصرفات جوزها اللي دايمًا بيضربها ويبهينها ومخلى حياتها كلها سودا، قوم إيه «الست سعاد» مكذبتش خبر ونصحتها النصيحة «المختلة» دى إنها تعمل لجوزها محضر وتخليه دايمًا مُهدد وبكده هتكون ضمنت إنه مش هيمد إيده عليها تانى وهيتقى زى الخاتم فى صباها.

تعالى لى هنا يا ست سعاد، طيب إنتى عملتى لجوزك محضر علشان خوفتى يمد إيده عليكى لما لقيتى بوادر إهانات وشتايم فقولتى تسبى وتقطعى عليه الطريق وتقيديه تماما من ناحيتك؟ طيب ممكن سؤال بسيط إنتى عايشة معاه إزاي؟ يعنى شكل حياتكم ماشى فى أى اتجاه؟ يعنى متخاصمين ولا متصالحين؟ بتتكلموا مع بعض عادى كده زى الناس المتجوزين ولا إيه ظروفكم؟ بتاكلوا وبتشربوا مع بعض؟ أقصد على ترابيزة واحدة؟ ولا كل واحد لوحده؟ بتناقشوا فى أمور العيال إزاي ولا مابقاش فى نقاش أصلا ما بينكم؟ فى حالة من الأمان أصلا بينك وبينه ولا عايشين وكل واحد فيكم مخون التانى؟ طيب إنتى إنسانة غير

سوية وجواكى شرر وغدر مش طبيعى، ليه عاوزة تعمى شرك ده وتنصحى غيرك يجرب اللى إنتى عملتيه؟.

الجواز مودة ورحمة، يعنى حياة كده دخلناها علشان تمشى بالود والحنية والتفاهم، وأهم حاجة فى الحكاية التفاهم، وقت ماتحسوا إنه مبقاش موجود، ووقت ما تحسوا إن الطرف التانى بدأ يتصرف تصرفات خرجت عن المألوف وهتوجعك أو هاتهنك، انفصلى ابعدى عنه بهدوء، أصلها مش حرب مين فينا هينتصر فيها ومين هايخسر، دى حياة لو ما اتعاشتش بالمودة والرحمة يبقى ملهاش لازمة أى تخاريف توصلها للحروب والمعارك اللى بنشوفها دايمًا وبكثرة.

يا ستى جوزك غلط ضربك إهانك وصلت معاه الحياة لسكة مظلمة أطلبى الطلاق، ابعدوا بالمعروف، أصل دى العلاقة الوحيدة اللى لو مش هتيجى باللين عمرها ما هتيجى بالعافية ما هو ماينفعلش تبقى على ذمته وتحاولى تقومى سلوكه معاكى بمحاضر عدم التعرض.

لو علاقتك إنتى وجوزك وصلت لطريق مسدود، وحسيتى إن الود بيموت ماتقاو حيش وتعملى ناصحة وتحاولى تصلحها بطرق توتر العلاقة أكثر، مش هايمنع تمسكى العصاية من النص.. تبقى اسمك متجوزة قدام الناس، وبينك وبينه حرب متدارية.

تفاصيل الحياة اللى تحت التهديد دى مابتدومش، ولما بتنتهى
بتنتهى بأذى مالوش حدود، ويا ست سعاد جوزك طلع راجل
طيب واستسلم للى عملتیه معاه، إنما فى أزواج تانية المواضيع
بتوصل معاهم لعند شديد وبتقلب بدمار شامل فى الآخر
للطرفين، فأرجوكى خلى نصايحك لنفسك.

العلاقات اللى زى دى هتنتهى يعنى هتنتهى، بس الحكمة بقى
فى إنك تنهى حياتك بأقل الخسائر الممكنة، ويا تبقى المعاشرة
بالمعروف يا إما بلاش

﴿ ممكن تشرولى صاحب؟ ﴾

أتمنى بل وأطالب بطرح كميات جديدة بنسخ معدلة من «كائنات الصحاب» قريبا فى الأسواق، بصراحة ماكدبش عليكم كل البضاعة اللى فى السوق اليومين دول إتضح إنها مضروبة، وأبوس إيد صناع النسخ الجديدة اشتغلوا بضمير شويتين وماتكروتوناش بل أطلبكم بدقة التصنيع، وإلا والله ماهنشترى ولا قطعة وهانسيبهم فى المحلات لحد ما البضاعة تبور، ما احنا عارفين إننا لو إشترينا وجينا نرجع هتقولوا لنا البضاعة لا ترد ولا تستبدل، ومش كل مرة هتسلم الجرة.

الصاحب زمان كان ونعم الصاحب، طيب وهو المفروض إن صاحب زمان ده مانرجعش نشوفه تانى، هل اقتصر مثلا على فترة زمنية معينة؟! ولو رجع فى الوقت اللى إحنا عايشين فيه ده واتعامل معناهايتحرق؟! مش عارفة إيه اللى جرى لصحاب

اليومين دول يا أختى! ما بقاش فيهم بركة ولا خير، يمكن نكون كترنا الملح شويتين فى العيش اللي بناكله مع بعض، ولا يمكن عوامل المناخ ووضعه غير المستقر أثرت على أخلاقهم وطريقة تفكيرهم.

هايجى واحد دلوقتى ويقولى إيه الإشاعات اللي عماله تطلعها على الناس دى؟ ما يمكن ولا مؤاخذة تكونى إنتى اللي مابتعرفيش تختارى الناس اللي تصاحبهم؟ هرد وأقول لك أنت مية مية وكلامك يتاقل بالمال، علشان كده أنا قررت أنى أوكل حد يشتري لى صاحب، ما يمكن أنا اللي مفترية وظلمت العشرين ألف اللي صاحبتهم طول حياتى، ومن هنا ومن موقعى هذا أعلن فشلى وأطالبكم بشراء صاحب ابن حلال كده ويعيش، بس ينفع تدونى فرصة أقوللكم أنا عاوزة صاحب يحتوى على إيه؟.

أطالب بصاحب يحتوى على ضمير صاحى، صاحب يحتوى على مبادئ لا تتغير، صاحب كده يكون نضيف من جواه زى ما هو يبحاول يزوق نفسه من براه.

أطالب بصاحب من اللي مايقولش «معلش»، أطالب بإلغاء هذه الخاصية فى الكميات الجديدة اللي هتنزل الأسواق، وينزلوا لنا دفعة جديدة من اللي بتسمعك للآخر وتتعب نفسها علشان تلاقي لك حلول.

أطالب بصاحب يحتوى على الوفاء وكثيرا من الثقة، الصاحب
ده اللى بيصون العشرة والعيش والملح، فاكرينه طبعاً؟ ولا
هتفتكروه إزاي ما هو شاح من السوق.

أحتاج لصاحب بقلب الأم وعقل الأب وجنون الحياة.

أحتاج لصاحب بطعم المواجهة والتوجيه.

أحتاج لصاحب من اللى بيقسموا الفرح والحزن واللقمة مع
بعض.

أطالبكم بصاحب يحتوى على صدق المشاعر، زهقنا بقى من
الكدايين، صاحب كده من اللى بوش واحد عارفينه وحافظينه من
اللى بيبقوا فى ضهرك زى وشك، صاحب بطعم الحب.

أطالب بصاحب عمر مش صاحب وقت ومصالح، صاحب
من اللى لو تأخرت فى السؤال عنه شويتين يعرف إنك محتاج
له، يقوم يجرى عليك ويقول لك مالك فيك إيه؟

أحتاج لصاحب يسألنى مالك من غير ما اتكلم، صاحب ما
يملش من سكوتى، من مزاجى المتقلب، صاحب مايخونش
صاحب؛ يدي زى ما بياخد، صاحب مايندميش على معرفته.

أحتاج لصاحب بطعم الحب بطعم الروح، بطعم الحياة،
صاحب من اللى بيخليك دايماً تقبل على الحياة ومشاكلها بقلب

جامد، صاحب دائما يقول لك أنا عاوزك ناجح ومشرق،
صاحب من اللي ما بيتغيرش بمرور الزمن والناس والأحداث،
صاحب ثابت عليك متمسك بيك.

أطالبكم بصاحب من اللي بيقوى العزيمة، صاحب بطعم
الأمل والفرح، من النهاية كده صاحب بطعم الحقيقة.

معلش طولت عليكم شويتين، بس كان كل ودي أساعدكم
وإنتوا بتصنعوا النسخ الجديدة من الدفعة اللي نتمنى إنها تنزل
الأسواق قريباً

﴿إزى إنسانيتك النهاردة؟﴾

إزى إنسانيتك النهاردة؟ إن شاء الله تكون بخير، أنا ودى بس أطمئن عليها أو بمعنى أصح أفكرك بيها، قوم شوفها كده شغالة ولا عطلت من الركنة، طيب شيل الحجارة وركبها تانى، جربت تعملها تمارين زى ما بتعمل لجسمك علشان تعمل سكس باكس وعضلات أو تاخذ لها دروس تقوية مثلاً؟، طيب جربت تلعب لها ضغط علشان تقويها؟، أو تأخذ لها فيتامينات علشان تزيد وتتحسن؟، هو إنت مجربتش تعمل لها دورة تدريبية مثلاً وتسميها كيف تصبح إنسانا فى خمس خطوات؟

أكيد لأ.. طيب شد مد شهيق زفير، هوب اتنين ثلاثة أربعة، تعالى هنا إنت بتعمل إيه؟.. بعمل التمارين الللى قولتى عليها علشان أصحصح إنسانيتى كده وأظبطها.

شوف أحيننا معجبوش الكلام واتعامل معاه بمنتهى الاستهزاء إزى؟ أنا عارفة إنك بتتعامل مع السؤال بنوع من أنواع التهريج

علشان تهرب من وجعه وعارفة كمان إنك من جواك بتقول يا أرض اتشقى وبلعيني، إيه السؤال اللي لا كان ع البال ولاع الخاطر ده، طبعاً عندك حق، أصل إنت لو قعدت فكرت بينك وبين نفسك هتلاقنا ركنا بند الإنسانية ده على جنب وماقاش فى قاموس تعاملاتنا اليومية من الأساس، تجردنا منه وعن عمد، ما هيدى الصفة الوحيدة اللي ما تقوليش إن المعيشة الصعبة وظروف الحياة هما السبب فى التخلّى عنها، دى صفة جاية من تكويننا، ولما إنت بتفقدوها بتبقى استغنيت عن نفسك من الأساس.

الإنسانية.. كلمة برضه ليها هيتها يا أحمى، فأكيد لما أسالك إزى إنسانيتك النهاردة؟ لازم تتخض، ما هو لما أسالك وأفكرك بيها وإنتلاغيها لازم تحس بضآلتك، لما تنسى الصفات اللي ربنا عز وجل خلقها فىك علشان يميزك يبقى لازم فعلاً تفكر وتراجع نفسك ألف مرة ومرة.

ابتسمت فى وش جارك النهاردة لما شفته وإنت نازل شغلك؟ لأ؟.. تبقى صفة الإنسانية مش شغالة عندك وعاوزة تتصلح، عارف ليه؟ لأن الرسول عليه أفضل الصلاة والسلام قال لنا: «تبسمك فى وجه أخيك صدقة»، وطالما إنت ما ابتسمتش فى وش جارك تبقى ما تصدقتش والإنسانية عندك بعافية شوية.

طيب جربت تكون شجاع لما شفت الأسطى عبده الميكانيكى بيضرب الواد حودة اللي بيشتغل معاه فى الورشة؟ وتروح تدافع

عنه وتخلصه من إيده؟ لأ.. طيب أحب أبشرك بإن الإنسانية عندك عاوز لها شوية فيتامينات تقويها حيتين، علشان الشجاعة فى الخير نوع مهم جدا من أنواع الإنسانية.

جربت تقوم من مكانك النهاردة وإنك راكب الأتوبيس، وتعدد الحاج حسين اللي واقف طول الطريق على حيله مكانك؟ لأ؟.. طيب ما هو كده يبقى معندكش رحمة ودى أهم صفة من صفات الإنسانية.

بقول لك إيه.. كانوا بيقلوا إن الست عواطف بعافية شوية من قيمة أسبوع.. رocht إطمنت عليها؟ لأ؟.. طيب وده اسمه كلام؟ هى مش الست عواطف دى برضه فى مقام خالتك؟، طيب إنت كده ما بتعرفش تحس بغيرك، وده بند خطير جدا من بنود الإنسانية.

جبرت بخاطر عم جلال «الغلبان» لما جرى يسلم عليك زى كل يوم وإنك راجع من الشغل؟ ولا قولت له إبعد عنى يا عم جلال علشان أنا مش طايق نفسى؟ لأ؟ ياخى ده جبر الخواطر على الله.

طيب جربت ماتفاصلش النهاردة مع الست أم محمود بياعة «الفجل» وتهد حيلها فى مناقشة كل يوم وإنك بتتهمها إنها بتغلى سعره؟ لأ؟.. طيب ولا مؤاخذة يعنى ما هو غلو سعر الفجل هيوصل كام يعنى؟ يا عم ماتجيش ع الغلبان، واعتبرها صدقة.

جاملت الأستاذ محسن فى فرح ابنه عماد؟ لأ؟.. طيب إنت تعرف إن من موجبات المغفرة إدخالك السرور على أخيك المسلم.

نزلت عزيت أبو كريم فى وفاة مراتهولا كبرت دماغك؟
بيقولوا إن أختك سعاد متخانقة خناقة كبيرة مع جوزها من قيمة أسبوع، ها.. هتروح تظمن عليها إمتى؟، ولا مش ناوى؟
اتصلت بأمك وأبوك النهاردة واطمنت عليهم ولا لأ؟ أعتقد إن دى حاجة بسيطة جدا.. ده مجرد اتصال، اوعى تقول لأ.

يعنى يوم كامل فى حياتك عدى كده من غير ما تعبر فيه عن إنسانيتك؟ من غير ما تمارس فيه بند واحد من بنودها؟ على الرغم من إن كلها حاجات سهلة وبسيطة ومش مكلفة.

الرحمة والمودة والابتسامه والخير بقت حاجات ثقيلة على قلوبنا ومكسلين نمارسها، مع إن لو تم استغلالها حياتنا كلها هترجع تانى أحلى وأحلى.

مهم قوى من فترة للتانية كل واحد فينا يسأل التانى «إزى إنسانيتك النهاردة؟»، يمكن لما نفكر بعض نحس شوية ونرجع نشغلها بدل ما هيعطلانة كده ولا تشتغل.

﴿ ماسورة ستات وانفجرت ﴾

الساعة الآن الثالثة عصراً، حان موعد قعدة الستات على كل القنوات الفضائية.

خير اللهم اجعله خير تفتح التلفزيون فى التوقيت ده تلاقى ماسورة ستات وانفجرت فى وشك بكل الأشكال والأحجام والألوان، حاجة كده تجبرك وتخليك غصب عنك تستقر على إحدى القنوات دى وتقعدهلشان تنفرج.

بعد خمس دقائق من الفُرجة على بعض برامج الستات، بتبدأ غصب عنك تدخل فى مرحلة من مراحل عدم الفهم، بتبقى عاوز تدخل جوه التلفزيون وتسكتهم من كتر ما شتتوك، يا ستى مش إنتى بتقولى إنك برنامج عن المرأة وبيهم المرأة ومحتواه عن المرأة، والرسالة الللى بيقدمها المفروض تبقى للمرأة، طيب إيه الليهيفيد المرأة لما تجيبى لها ممثل شاب ويحكى لها عن رحلة صعوده مثلاً؟!

يعدى نص الوقت وإنه مصمم تتفرج يمكن تلاقى حاجة فعلا تحسسك إن دى برامج عن المرأة، وإن الهدف منها إفادتها والتحسين من مستواها الفكرى والصحى والثقافى والاجتماعى، وفجأة كده وبقدرة قادر تلاقىك دخلت على فقرة المطبخ، وكان اللى كان ناقص ست البيت الأصيله هو برامج تعلمها الطبخ، أحب ألفت نظر حضراتكم إلى إن ستاتنا بيعرفوا يطبخوا وحتى اللى ما بتعرفش تطبخ فيهم أكيد هتروح تتفرج على القنوات المخصصة للطبخ ودى ما أكثرها ربنا يزيد وبيارك.

يعدى الوقت وتهل علينا الفقرات الأكثر أهمية وهى فقرة «الموضة والجمال»، وكان دى الحاجة الخطيرة اللى الست البسيطة فى البيت قاعدة مستنياها وبتقطع من جواها علشان تتابعها، ما نقدرش ننكر إن فى قطاع من الستات مهتم بالجزء ده، لكن فى قطاع آخر كبير ما يهموش يعرف آخر ما توصلت له صيحات الموضة فى العالم، ومستنى منكم تلمسوا احتياجاته.

طيب أخذنا نفس عميق وعدينا فقرة المطبخ والموضة والممثل الشاب اللى كان بيحكى رحلة صعوده فى برامج المرأة، ندخل بقى على الفقرة اللى فيها الأمل واللى بتتكلم عن العلاقات الاجتماعية وعلاقة الرجل بالست، ذنب الست البسيطة اللى قاعدة بتتفرج عليكى دلوقتى إيه وإنتى بتوجهى لها رسالة من واقع تجربتك الشخصية، يعنى إنتى متخائفة مع جوزك أو

مطلقة منه أو كارهاه، تجربتك دى تحتفظى بيها لنفسك، تناقشى فيها حد متخصص، دى مشكلتك إنتى الشخصية، ولو هتقولى لها رسالة يا ستى ذنبها إيه إنك توصلى لها رسالة غير صحيحة من واقع تجربتك اللى ممكن تكون بتختلف تماما عن تجربتها، واللى ممكن تكونى بتوصلى بيها رسالة معينه لشخص ما.

عدينا فقرة نصايح المذيعات وجينا لفقرة المتخصص اللى هيتناقشوا معاه فى العلاقات هنلاقى كل البرامج تسيطر عليها نفس العناوين وهى إزاي تاخذى حقتك من جوزك لوداس لك على طرف، وطبعا نصايح المختصين بتكون أكثرها هادمة للعلاقة، وكأن بيوتنا مابقاش فيها غير المشاكل والخناقات بين الرجل والست، فجأة كده برامج المرأة حولتهم لأعداء بيخلصوا حقهم من بعض.

طيب ماحاولتوش ليه تعلموا البنت إزاي تتعامل مع جوزها صح لما نحس العنوسة اللى هريتونا كلام عنه يتفك؟! طيب ماقولتوش ليه للستات انفصلوا بالمعروف وبلاش تفرجوا الناس عليكم؟ ولا هى لازم تديله على دماغه علشان تبقى كده قوية؟! رسايلكم للأسف بقت عنيفة وليست فى صالح المرأة.

كثير جدا من البرامج دى أثرت بالسلب على العلاقات الأسرية، كثير من البرامج دى وصلت الحياة بين الأزواج لطرق مسدودة جدا.

طيب فين بقى الست البسيطة من البرامج دى؟ استفادات إيه؟
طيب عرفتوا الست ديازى تربي ولادها؟ إزاي مثلا تتعامل مع
ابنها المراهق؟ طيب ماشوفناش ليه ستات مكافحات من اللى
بيربوا وبيعملوا أمجاد علشان يبقوا قدوة لغيرهم فى برامجكم
دى؟، طيب احترام الزوجة لزوجها واحترامه ليها مابتكلمش عنه
ليه، طيب ماتكلمتوش ليه عن مشاكل البنات الليماليه الدنيا،
وفين النماذج الحلوة منهم اللى بتدينا أمل فى الحياة؟

يعنى برامج الستات مابقاش ليها مضمون غير الخيانة
وتخليص التار بين الرجال والست مع شوية موضة وطبخ؟

كنا نتمنى إن البرامج اللى بتتكلم باسم المرأة تبقى أكثر إفادة
للمرأة، ولكن ما نراه الآن على الشاشات ما هو إلا برامج تضر
المرأة وتوجه لها رسائل خطيرة تؤثر عليها وعلى كل ما يخصها،
الرجاء الاهتمام بالمرأة فى البرامج المخصصة للمرأة، لأن الست
البسيطة هى من تدفع ثمن هذه الرسائل.

﴿ هاتحرس بيها هاتحرس بيك ﴾

ما انتي مش هاتفضلي قاعدة خايبة كدا وحاطة إيدك على خدك ومقضيها شحفة، من هنا ورايح اللي يتحرس بيكي تتحربي بيه على طول ما هو العين بالعين والسن بالسن والبادي أظلم، سيبك بقى من ضعفك وقلة حيلتك اللي مضيعين حقك دول، ما انتي ياما اشتكيتي وبكيتي وخوفتي وانهارتي، حد كان واقف جنبك ولا حتى حاول يساعدك؟!.

نسيتي القلم اللي نزل على وشك لما روحتي تستنجدي بالست والدتك لما حصلت لك واقعة التحرش واتهامها ليكي كمان بإنك أكيد عملتي حاجه غلط استفزت الشخص اللي قدامك وخلته يتحرس بيكي، نسيتي كمان تهديدها ليكي بإنك لو جبتي سيرة لمخلوق باللي حصل معاكي هاتقطع خبرك، طيب ده كان موقف القريب منك ما بالك بقى بموقف الغريب.

انتني من وجهة نظر مجتمعتك مذنبه ودايما متهمه، وبتساهمي كمان في عملية التحرش بيكي، وبتطوعي في الأخر إنسانة غير

مسؤولته، بتدي للمتحرش مساحة وفرصة، اللي يضحك قوي
ياجدع إن المتحرش يبطلع برئ في الآخر ويندور له على حجج
وبنديله الفرصة يبجح ويدافع عن نفسه في نفس الوقت اللي
بنكون علقنا المشنقة للضحية، وبتتهمها بسوء الأخلاق والانحراف،
قد إيه احنا منصفين!.

هاحكي لكم حكاية صغيرة كدا على سبيل المثال: «بنت في
الصف الثالث الثانوي ركبت الميكرباص وهي راجعة من السنتر
كان عندها مراجعة، ركب جنبها شاب شكله ماكانش يدي إنه
ممكن يعمل اللي عمله كانت قاعدة جنب الشباك وهو جنبها
وقاعد على نفس الكنبه راجل كبير، فجأه البنت لقت الشاب
المتحرش بيعمل حركات مش مضبوطة وباصص لها جداً ومركز
معاها، البنت بدأت تتحرك لحد ما لزقت حرفيا فى الشباك
وبدأت ضربات قلبها تزيد وكانت هتموت من شدة الرعب اللي
وصلت له، وبقت عماله تبص ناحية الراجل الكبير علشان يسألها
مالك لكن هو ماكانش مركز أو ماتعرفش بقى كان شايف وساكت
ولا إيه، بصت للمتحرش وقالت في عقل بالها يمكن يتلم شويه،
بالعكس تمادى وحركاته غير المحترمة زادت أكثر، والرعب
والخوف بدأوا يزيدوا أكثر وأكثر، مشوارها كان طويل وكان كل
اللي هاممها أنه ما يلمسهاش وكانت مرعوبة انها تقول لحد فى
الميكروباص لانها كمان كانت فى الكنبه الأخيرة، فجأه الراجل
الكبير وقف السواق ونزل، اترعبت اكرت وخافت ينتهز الفرصة

ويعمل حاجة، فقررت تنزل هي كمان وكلها رعب ووقفت في الشارع تعيط، نزلت في مكان ماتعرفش فيه حد من الرعب اللي شافته في خمس دقائق كانوا بالنسبة لها أصعب واطخر لحظات عاشتها في حياتها، ولحد دلوقتي مرعوبة ومش قادرة تنسى اللي حصل لها، ولما حكت الواقعة لوالدتها سمعتها كل أنواع الإهانة».

الأستاذ اللي هيسأل عن لبسها دلوقتي علشان يدافع عن المتحرش، بطمنك انها كانت لابسة لبس محتشم جدا، الحاجة اللي هاتقول تلاقيها عملت حركة كدا ولا كدا خلتها يعمل اللي عمله، أحب أقولك إنالبتت من أول ماركبت وهي باصة في الكتب بتاعتها علشان كان صايح عليها امتحان، الأخ اللي هياقول إيه اللي خلاها تسكت مافضحتوش ليه في الميكروباص يبقي تستاهل اللي حصلها، أحب أقولك ان طريقة كلامكم دي واتهاماتكم المستمرة دي سبب رئيسي في الرعب اللي بتوصل له بناتنا، مسببين لهم دائما ارتباك، لا عاوزينها تتكلم وتدافع عن حقها ولا عاوزينها تسكت، وفي الحاليتين حقها ضايع ومايجيش وبتفضل كل بعارها وفضيحتها اللي مجتمع بأكملها صنعها.

من هنا ومن موقعي هذا بقولك لازم تاخدي حقك بنفس طريقة المتحرش وزر مايتحرش بيكي اتحرشى بيه، أفقى له عالناصية وقوليله أبشع الألفاظ، اركبي الأتوبيسات وركزي في تفاصيل جسمه، وماتنزلش عينك من عليه، خليه يتوتر من

تصرفاتك خليه يعيش لحظات شك وعدم تركيز من اللي بيوصلك ليهم، امسكى آلة حادة وقطعي بيها وشه لو فكر يبجح فيكي أولك يسألك إنتي تبصيلي كدا ليه؟ ماهي طالما مش عارفه تاخدي حقك ولا مجتمعك واقف جنبك خديه انتي بنفس طريقة المتحرش ونبقى كدا خالصين.

طبعاً كلكم صدقتوا كلامي وبتقولوا هي بتخرف ولا بتقول إيه، بنات إيه اللي تتحرش بالشباب، انتي عاوزه تقربي حال الدنيا، بتشجعي البنات والستات على قلة الأدب، لا إحنا مش هانسكت لك على بتقوله ده، أنتي أكيد اتجنتي.

اطمنوا يا اخوانا انا بس الجلالة خدتني وموقف البنت وحالها وحال بنات وستات كثير زيها استفزني، أكيد كنت بخرف من الاستفزاز.

ما تأخذوني شيا جماعة بس أنا حطيت نفسي مكانها وحسيت بشعور الخوف والرعب والظلم اللي حطها فيه المتحرش ومجتمعهما، فاتخيلنا لأفكار السودادي.

أنا بس كنت عاوزة أسأل: «إمتى هنعاقب المتحرش عقاب رادع يخليه عبرة لغيره، وإمتى هانبطل ندور على مبررات للمتحرش ونظلم الضحية، ولحد إمتى هانفضل البنت هي المسؤولة؟ والسؤال الأغرب واللي مش لقياله حل: ليه الأهل أول الأعداء دائماً في واقعة التحرش بيناتهم، دوروا بقى على حلول حقيقية مش على مسكنات.

◀ (الحمقونا بمبيدات حشرية للناس العشرية) ▶

الاستاذ لطفى و دعاء مراته وولادهم أسامة وعبد الرحمن دايمًا حاسين إن معمول عليهم حظر تجوال من عم أنس الحلاق أल्ली فاتح محل حلاقة في أول دور من العمارة اللي ساكن فيها الأستاذ لطفى وعائلته.

الاستاذ لطفى كان فاكر ان عم أنس الحلاق أهياحل عن سماه وهايبيه في حاله هو ومراته وولاده، بعد ما عمل تجديدات مُعتبرة في المحل بتاعه وخلاه على سنجة عشرة، وهايكرز بس مع الزباين، اللي ماشاء الله بقت تهل عليه من كل حته.

لكن الحقيقة عم أنس خيب ظنه وفضى نفسه خالص وجاب عمال على أعلى مستوى يشتغلوا معاه، يعني كدا كدا مركز معاك يا عم لطفى لامفر.

فكرة إن حد يبقى مراقب كل تصرفاتك وبيتدخل في كل أمور حياتك دي كانت حاجة مضايقه لطفى ومراته وولاده جدا، من عم

أنس اللى على طول بيسأل عن كل حاجة تخصهم لدرجة إنهم كانوا يحاولوا يستخبوا منه فى الطالعة والنازلة أو يبقى معاهم اختراع زى طاقة الإخفاء يقدروا يتحركوا بيه على راحتهم .

خير يا أستاذ لطفى أنت سرحان ولا إيه، واخذ فى وشك وما سلمتش عليا، بصوت مجهد رد لطفى أبدا ياعم أنس أنا بس راجع من الشغل تعبان ومش هقدر أقعد معاك خالص النهاردة، يدوب اطلع ارتاح ليشوية، بكل تصميم وشغف عم أنس رد وقاله لأ.. تعبان إيه تعالى بس نقعد شويه مع بعض نشرب القهوة ونرددش، إلا قولى أنا كنت سامع صوت عندك امبارح فى الشقة إنت كنت بتزقق مع الولاد ولا مع المدام، لا مؤاخذه يعنى فيدا السؤال، أصل انا شوفتها نازله هى و الولاد بعد ما سمعتك بتزقق بس أنا كنت جوة المحل و مالحقتش أسالها مع إنكم كنتوا راجعين مع بعض بعد الشغل زى السمن عالعسل، خير طمنى فضفض لعمك أنس، وكمان «أسم النبى حارسه» أسامة ابنك كان من قيمة يومين كدا طالع الشقة ومعاه أفندى حليوة وشه بيضحك بس مالحقتش أسلم عليه أوالدكتور شوقياً خوك والحاجة والدتك بقالهم مدة ماجوش يزوروك ليه، إنتوا زعلانين من بعض؟ طمنيا حبيبي .

كان رد لطفى على كل الاسئلة دى إنه قام من مكانه وقاله بعد إذك ياعم أنس أنا راجع من الشغل تعبان وعاوز اطلع ارتاح، بكل فضول رد عم أنس أهصحيح قولى انت عملت ايه فى الشغل النهاردة؟، اترقيت ولا لسه؟، مدير كويس معاك ولا لأ؟ طمنى يابنى .

بكل هدوء انسحب لطفى وساب عم أنس يكمل كلامه مع نفسه وطلع شقته علشان يرتاح، بس عم أنس فضوله زاد وقرر إنه لازم يعرف لطفى كان بيزعق ليه امبارح ومين الأفندى الحليوة اللى كان أول مرة يشوفه مع أسم النبى حارسه اسامة والحاجة والدكتور شوقي ماجوش بقالهم مدة ليه .

حمد الله عالسلامة ياست الكل، راجعه ليه متأخر النهاردة؟ ده كان الاستقبال اللطيف من عم أنس لدعاء مرات لطفى علشان يحزن قلبها، وتجاوبه على أسئلته اللى ماجابوش عليها جوزها، أهلا ياعم أنس خير إن شاء الله، أنا راجعه من الشغل هلكانه وشايله، ورايا طيخ والعيال زمانهم على وصول من المدرسة وعاوزة ألحق أعملهم الغدا، سبنى والنبى فى حالى النهاردة، ده كان رد دعاء على عم أنس قبل مايبدأ حصار الأسئلة اللى خنقتها هيه وجوزها وولادها لدرجة أنهم بقوا يحسوا أنهم متراقبين فعلا .

طبعاً عم أنس اتضايق جدا ، بس مافقدش الأمل وقرر إنه يعرف كل حاجة من أسامة وعبدالرحمن ولادهم وهما راجعين من المدرسة بس للأسف الولاد كمان المرة دى ،خيبيوا ظنه ومحاولات استدراجهم بالشكولاتهما جبتشفايدة لأن الولاد نفسهم ملوا من أسئلة عم أنس المستمرة .

عم أنس .. ده الشخص الفضولى اللى بنسميه الحشرى اللى زهق أستاذ لطفى وعائلته من كتر ماهو حابب يتدخل فى تفاصيل حياتهم ويعرف كل كبيرة وصغيرة عنهم .

عم أنس راجل طيب ممكن يكون عاوز يعرف التفاصيل دى عن حياتهم لمجرد الفضول بس، يعنى مش هايضرهم فى حاجة مجرد إنه عاوز يبقى ملم بكل التفاصيل اللى حواليه حتى لو ماتخصوش.

بس للأسف فى نوعيات تانية فى حياتنا فضولهم مُضِر، يعنى بيعرفوا تفاصيل حياتك علشان تبقى مواضيع يحكوا فيها مع أصحابهم وجيرانهم، وهما ييشربوا شاي العصارى مش بس كذا ده ممكن يستغلوها أسوء استغلال.

أيا كان بقى نوع الفضول، أو نوع الناس اللى بتمارس الفضول، هو ليه طول الوقت أحس إنى متعري لمجرد إن فيه ناس حشرية عاوزة تعرف أنا أكلت إيه، وشربت إيه، هاتجوز إمتى؟، أمى بتحب مراتى ولا لأ؟، أولاد ينحجواو؟، أخويا بيزورنى ولا مقاطعنى؟، مراتى ولدت ولا مش هتولد خالص؟.

خصوصيات الناس دى خط أحمر، يعنى ماينفعش أعيشهم دايمًا فى قلق وأفضل مراقب تصرفاتهم و مركز معاهم .

عم أنس فى منه كتير فى حياتك، ممكن يبقى قريبك، صاحبك، جارك، صاحب أبوك، زميلك، مديرك، سواق الميكروباص، يعنى لافتر من وجوده، شطارتك بقى إنك دايمًا ماتريحوش لحد مايمل أو ييطل و يسبب الكار.

لكل واحد عايش دور (الحشرى) فى حياتنا، أرجوك خف شوية علينا، ربنا يسترک.

﴿ طلق مرآتك هتجبها أكثر ﴾

بقولك إيه ياختي طول ماهو عمال على بطال بيتكلم عن ثقافة الست سهير، ورقة الست سامية، ونضح مدام عبير، ودلع الأستاذة دينا، وشياكة الست سارة، ومنهار دايمًا من جمال فساتين الست أسما، ومتفق في الرأي مع الست هدير، وهيمان في رسم الست جيهان، ويقول شعر فى طيخ الست دعاء، ومتجاوب دايمًا مع كل الستات اللي حواليكى، ومحموق عليهم كأن إسم النبي حارسه كاتب عليهم كلهم، اطلقي منه... أيوه اطلقي منه .

الأستاذ عبدالنواب من ساعة ما اتجوز الست فوزية وهو عمره ما إدالها ريق حلو، بيتعامل معاها على إنها كائن ما عندوش عقل، واقف لها عالواحدة يا حبة عيني، مجرد ما تفتح بوقها وتقول رأيها في أي موضوع يقفل عليها الطريق، ويقولها إنتى مش فاهمة حاجة اسكتى ماتفتيش، دايمًا شايف إنها ما بتعرفش تفكر ولا بتعرف تتكلم ولا تناقش، شايفها دايمًا أقل من كل الستات اللي حواليتها .

الأستاذ عبدالتواب دائماً شايف طريقة لبس الست فوزية مراته مش بنفس شياكة طريقة لبس جيرانها وصاحباتها وأى ست تانية من اللي هو معجب بطريقة لبسهم، لدرجة إنه ماعجبوش الفستان اللي كانت لبساه في خطوبة لمياء بنت أخوه وقالها إنه متخنها جداً ومش لايق عليها مع إنه نفس الفستان اللي كانت لبساه الست أسما لما كانت بتزورهم الأسبوع اللي فات وكان شايف الفستان عليها في قمة الشياكة.

الأستاذ عبدالتواب دائماً مبهور بالست جيهان ولوحاتها وموهبتها في الرسم ويعتبر نفسه من أهم المشجعين ليها، في الوقت اللي كان يقلل من موهبة الست فوزية مراته لما قررت تنمي موهبتها في الرسم على الزجاج وقالها بطلي لعب عيال إنتي مش صغيرة سيبى الحاجات دي لولادك ماتضحكيش الناس عليكى هو إنتي هاتخيبى ولا إيه.

الست فوزية قررت إنها تفاجىء الأستاذ عبدالتواب، وتعمله صنية المسقعة باللحمة المفرومة بما أنه أقرب طريق لقلب الراجل معدته يمكن يرضى عنها ويجبر بخاطرها شويه، ومع أول لقمة في صنية المسقعة بدأ سي عبدالتواب يقارن بين طيخ الست فوزية والست دعاء صاحبها، وقعد يوم كامل يتغزل في صنية المسقعة اللي أكلها عند الست دعاء في عزومة فطار شهر رمضان اللي فات.

الست فوزية في يوم قالت في عقل بالها أما أقوم ألبس
واتزوق وأتدلع علي سي عبدالتواب شويه ماهو جوزي برضه،
هو شافها بتدلع عليه من هنا وعينك ماتشوف الا النور قالها كلام
يسد نفس أي ست 100 سنة قدام، مع إنه يموت في دلع الأستاذة
دينا ونعومتها.

الأستاذ عبد التواب زيه زي رجالة كتير بيعانوا من نفس
المرض، مرض الإعجاب بكل ماهو غريب عنه أو مش قادر
يطوله، مرض كدا بيخليه يشجع كل الستات اللي حواليه ويجبر
بخاطرهم، ما عدا الكائن الوحيد اللي اسمه مراته دايمًا كاسر
بنفسهوبخاطره.

الست فوزية ممكن تكون أرق من الست سامية، وأكثر فهما
وثقافة من الست سهير، وممكن تكون أشيك من سارة وموهوبة
زي جيهان وبتطبخ أحسن من دعاء ودلوعة زي دينا بالظبط، بس
أنت دايمًا مبهور بالغريب عنك، ومش قادر تدي اللي معاك
حقها، بتفضل تظفي فيها لحد ما تدبل وتموت، وبعدها تشتكي
منها وتعايرها بإنها مش زي الستات الثانية، ماهو أنت اللي
مابقتش ترويهها يا أخی، وبخلت عليها بالميه اللي بتوزعها على
الستات التانيين .

أقولك على حاجة يا أستاذ عبدالتواب جوز الست سامية اللي
أنت بتعشق رقتها هو كمان شايف إن الست فوزية مراتك في

منتهى الرقة، وجوز الست سهير اللي ثقافتها مش منيماك الليل،
مبهور جداً بتفاصيل دماغ مراتك ومعجب جداً بطريقة تفكيرها.

عاوز تحب مراتك وتشوفها مبهرة ومميزة وشيك وبتفهم يا
أستاذ عبد التّوّاب؟! طلقها.. أيوه طلقها لما تلاقىها مش ماله
عينك وبتشوف كل الستات أفضل منها طلقها، وشوفها من بعيد،
اتعامل معاها على إنها شخص غريب عنك، وأوعدك وقتها إنك
هاتنبهر وهاتلاقىها احلوت فى عينك، ونار الحب واللوعة هاتهب
على قلبك من حيث لا تدري وهاتعمل المستحيل علشان ترجع
لها تانى لأنها من الأساس ما فيهاش أي عيب، العيب الوحيد
اللى فيها هو إنت ياسي عبدالتّوّاب.

لما تحس إن كل الستات عجبك ومراتك لأ.. طلقها وهى
تعجبك، ليه لأ ماهو ممكن يكون الطلاق فى بعض الأوقات
تجديد لمشاعر الحب والهيام، عموماً أنت مش هاتحس بقيمة
الحاجة إلا لما تضيع منك، ماهو المثل بيقول القديمة تحلى.

◀ (الحقوا المعلى قبل ما يخلص) ▶

تعرفوا أن كلمة «معلى» اللى عمالين نقولها عمال على بطال، وبمناسبة ومن غير مناسبة، وسواء تنفع في الموقف اللى بتتقال فيه ولا لأ. أصلها إيه، أصلها ما عليه شيء، كلمة كده كان يقولها القاضى زمان لما شخص يحصل على البراءة يعنى برىء يا بيه..!

بس إحنا شعب طبعاله العجب ميسبب حاجة على حالتها وقرر يستعملها استعماله الشخصى.

لما تسأل شخص النهاردة إيه أكثر كلمة بتستفزك؟ هيرد عليك فوراً ويقولك «معلى».

الكلمة اللى إحنا أصلاً استخدمناها لتطيب خاطر، تحولت فجأة وبقدرة قادر لأكثر كلمة مستفزة لأى شخص، ممكن لأنها أصبحت تتقال بمناسبة ومن غير مناسبة، وممكن كمان لأنك مابقتش واثق في اهتمام الشخص اللى يقولك «معلى» وممكن

لأنك بقيت متأكد أن الليبيقولك «معلش» يقولها لك من باب الاستسهال.

لاحظت هبة صاحبتى في يوم إنى مضايقة ومتغيرة عن كل يوم ومش مركزة في أي حاجة بعملها، في مبادرة جميلة منها الحقيقية سابت اللى في أيديها وجت وسألتنى مالك فيكى إيه، خير طمىنى عليكى، أقولك على حاجة أحسن تعالى نقعد شوية مع بعض احكىلى إيه اللى مضايقتك وإن شاء الله نلاقى حل.

استجبت لدعوة هبة الكريمة بعد إصرارها على إنى لما أفضفض معاها هرتاح أو هنلاقى حل للمشكلة زى ما أوهمتنى، وبدأت أحكىلها فعلا على اللى مضايقتنى، وكان الموضوع فعلا مهم بالنسبة لى ومأثر عليا بشكل سلبي، وكان واضح ده جدا خلال الساعة اللى حكيت لها فيها الموضوع.

معلش.. تشربى نسكافيه؟..

ده كان رد هبة بعد ماسمعت حكايتى، وعرفت إيه اللى مضايقتنى، وبالرغم من إنالموضوع كان فعلا مهم وبالنسبة لى خطير، وكنت فعلا محتاجة أي كلام يوصلنى لحلول من أي شخص، إلا إن هبة اكتفت بأنها تقولى معلش، المستفز في الموضوع أكثر إنه خلال الفترة اللى كنت بحكى فيها لهبة على موضوعى بعد إلحاح منها، كانت طول الوقت مشغولة في الموبايل بتاعها وشوية سرحانة وشوية مشتتة يعنى ما كانتش مركزة معايا خالص.

الشيء العجيب في الموضوع أن هبة من الشخصيات اللى عندها فكر، يعنى تقدر تفكر معايا فعلا في أسباب المشكلة، وتقدر بسهولة جدا تلاقى لها حلول، بس هبة فضلت تستسهل وتقولى معلش، وأهسى تبقي جاملتنى، يعنى هتسمعى وكمآن هتقولى على حلول.. ده أنا أبقي طماعة قوى.

مشيت من قدام هبة وأنا في قمة الاستفزاز من ردها، ويسأل نفسي ليه ردت عليا الرد ده؟ ليه استسهلت؟ ليه ما أخذتش الموضوع على محمل الجد؟ ممكن يكون في حاجه شاغلة تفكيرها، بس لو كان فيه ليه ألحت عليا وختلتنى أحكيها على اللى مضايقتنى؟ وبعدين دى كانت طول الوقت مشغولة في الموبايل وبتضحك، يعنى أكيد مفيش حاجة مضايقاها، عشرات الأسئلة دارت في بالى بعد رد فعل هبة على مشكلتى بمعلش.

رجعتلها تانى وأنا في قمة الاستفزاز، وقولتلها: يعنى أعمل إيه بـ«معلش» اللى قولتيها لى دى؟ هتفدى بيايه؟ خلتينى أحكيك ليه طالما مش هتشوفي معايا حل للمشكلة؟ أجبرتينى ليه إنى أحكيك؟ ده حتى محاولتيش تناقشيني فيها؟ اكتفيتي بكلمة معلش اللى مش هتفيدنى في حاجة، كان ردها عليا بمنتهى البساطة: «إحمدى ربنا أنك لقيت حد يقولك معلش» وبعدين كيفيكي أنك فضفتى عن اللى جواكى ومضايقتك، أصلا بمقاش في حد عنده طاقة يحل مشاكله يبقى هيحل مشكلات غيره إزاي،

اسندى نفسك بنفسك وحلى مشاكلك لوحده، مابقاش حد
فاضى لحد حتى لو ما عندوش مشكلات، بجد افرحيان في حد
لسه بيقولك «معلش».

يعنى إيه أحمد ربنا إن في حد لسه بيقولى معلش، ويعنى إيه
اسندى نفسك بنفسك ومتاخدش رأى حد، أمال ربنا خلقنا في
الدنيا كلنا مع بعض ليه؟ وليه خلقنا عقول مختلفة؟ ويعنى إيه
كفاية إني فضفت؟ استفدت أنا إيه بالفضضة وأنتى مش
سمعانى أصلا وسرحانة في حاجات تانية.

يعنى إيه معلش تبقي هي الرد الدائم على كل كلامنا مهما
كانت خطورته، لأبقى معلش ياهبة أنا مش عاوزة أفضفض من
غير حلول، وطالما أنتى مش مركزة معايا أصلا بيقى بلاها
معلش.

﴿ زهقتنى بروح أمك ﴾

طلعت الميكروباص وكنت فى قمة سعادتي علشان المرة دى قدرت أمارس طقوسى، وركبت عالكنبة الأخيرة جنب الشباك، وفتحته على آخره، حكم أنا أحب قوى أبص منه والميكروباص ماشى على آخره بحس ساعتها كده إنى طيارة، وبينى وبينكم الشعور ده بيخلينى أنسى هموم اليوم كله، وكنت كل مرة أركب الميكروباص يقعد جنبى ناس ما يحلاش لها الكلام فى أمورهم الشخصية غير جنبى، وفى ودنى، وكمان ياخدوا رأى ويدخلونى فى الحوار غصب عنى، ما علينا مش عاوزة أشغلكم بظروف حياتى الخاصة أكثر من كده، المهم ربنا كرمنى وقعد جنبى اثنان ما بيتكلموش خالص، كملنا فى الطريق وأنا باصة من الشباك ومحلقة فى السما زى الطيور ومبسوطة آخر انبساط، وفجأة حصل اللى حصل.

زهقتنى بروح أمك، قرفتنى طول الطريق أنت وأمك، أنا غلطان إنى جيت مع أمك الدرس النهاردة، أول وآخر مرة أعتمد

على أمك في حاجة، اتخضيتوا طبعاً زى ما أنا اتخضيت؟ قاعدة في أمان الله زى ما قولت لكم وفي قمة سعادتى وإذا بالجمل دى تفوقنى وتخرجنى من الحالة اللى كنت فيها ونزلوا على ودانى كده يا أخويا زى الوجة اللى ما قدرتش أتحملة.

سى عمر وسى يوسف تلاميذ فى الإعدادية راجعين من درس اللغة الإنجليزية وراكبين قدامى فى الميكروباص، سى عمر أفندى ما عجبوش شرح المدرس اللى جاى من طرف يوسف، فكان كل ما يوسف يحاول يكلمه أو يسأله عن حاجة يرد عليه بردود لا تخلو من سيرة الأم.

الكارثة فى الموضوع مش كلام عمر وردوده غير المحترمة بس، المصيبة الأكبر استقبال يوسف لنوعية الردود دى واللى كان بيستقبلها بضحكة غريبة جايبة من ودنه دى لودنه دى، أنا كنت بتفرج عالوقوف عادى وعاوزة أشوف رد فعله على كلام صاحبه ومستنيه ياخذ موقف تجاهه ويوقفه عند حده، لحد ما اتصدت برد فعل يوسف اللى فاجئنى أكثر لما رد عليه هو كمان وقاله ما خلصنا وما تخلنيس أغلط فى أمك إنت كمان.

أنا بصراحة لحد كده ومقدرتش أتحمّل اللى بيحصل قدامى وما حستش بنفسى غير وأنا بقولهم عيب الكلام اللي يتقولوه لبعض ده، ما ينفعش تتجاوزوا على بعض قدام ناس غريبة، وكمّان عيب تجيبوا سيرة أمهاتكم بالطريقة دى وبالأسلوب ده.

كنت فاكرة إنهم هايتكفسوا على دمهم ويعتذروا لبعض
ويوعدوني إنهم مش هيقولوا الكلام ده تانى، بس الظاهر إن ده
كان حلمًا جميلًا بحاول أصبر نفسى به، وصحيت على الواقع
الأليم وسى عمر بيقولى وإنتى مال أهلك إنتى.

الحقيقة أنا سمعت رده من هنا وما قدرتش أفتح بوقى
ورجعت أخذت وضعى عالكرسى وما طلعتش نفس، من ذهول
رد سى عمر عليا، ما فوقتش غير والسواق بينده على المحطة
اللى هنزل فيها.

نزلت من الميكروباص وأنا فى قمة الغيظ من العيلين اللى
لسه ما طلعتش من البيضة وكل واحد فيهم بيشتم التانى بأمه،
ومش مكسوفين ولا عاملين اعتبار لحد، وبقيت ماشية أسأل
نفسى هو إيه اللى بيحصل؟ والأهالى ليه سايبة ولادها كده من
غير تربية، زمان ماكانشأى حد يقدر يجيب سيرة أم التانى حتى
فى الهزار، لقب واسم الأم كان خطأ أحمر، إيه اللى حصل لجيل
اليومين دول وخلاه مابقاش عنده غيره على اللى يخصه.

كلام يوسف وعمر ضايقنى، والليضايقنى أكثر طريقة ردهم
عليا، بس قولت فى عقل بالى وأزعل ليه طالما هما أصلاً مش
حاسين بغلطهم ومدى تجاوزهم.

ما تستهنوش بتربية ولادكم، وهفضل أعيد وأزيد، اتعبوا
عليهم، مفيش عيل بيتربى لوحده، وزى ما بتتعبوا فى خلفه العيال

اتعبوا وربوهم علشان ما ترجعوش تشتكوا من تصرفاتهم معاكم
ومع الناس.

ربوا عيالكم وطلعوهم صالحين وعندهم أخلاق، علشان ما
يجيش واحد فى يوم من الأيام يقول ما لقوش أهل يربوهم،
خلوا دايمًا اللي يشوف عيالكم يدعى لكم عالتربية الصالحة.

الظاهر كده إن فى حد عاملى عمل اليومين دول فى الميكروباص
اللى بركبه، يلا شكلى مش مكتوب لى أطيرو وأرفرف فى الفضاء.

◀ (سوق العرسات انضرب) ▶

قاعدة لابيا ولاعليا على الكنبه الليفى آخر
الميكروباص، حكم أنا أحب قوى أقعد جنب الشباك وأفضل أبص
منه طول الطريق، بحس كدا يا اخويا إنى طايرة فى السما
بجناحاتى، ما علينا مش عاوزه أطول عليكم وأشغل بالكم بتفاصيل
مشاعرى وأحاسيسى، وفجأة وأنا قاعدة بستعد للرحلة، ركب جنبى
إتين كدا باين عليهم «الحب» هتقولى عرفتى إزاي؟ هقولك ولا
مؤاخذه بفهمها وهى طايرة، من ساعة ماركبوا ماسكين إيدين بعض
تقولشى حد فيهم هايهرب من التانى وهاتك ياتسييل، أنا كنت
قاعدة فيحالعلشانمحدث يقولى وإنى اللى يخليكى تركزى معاهم
لحد مالقيت الموضوع إتطور ووصل لموجة من الحب والمشاعر
جعلتنى أشعر إنى بتفرج على فيلم رومانسى قديم، ماكدبش عليكم
الكلام كان طالع من بوقهم كأنه زقزقة عصافير كنارية وقت
الصباحية، ومن هنا عرفت إنهم مخطوبين جديد.

وبعد وصلة حب وتسييل ومشاعر ملتبهة استمرت نص ساعة قامت القيامة لمجرد إن «مروة» خطيبة «أحمد» ردت على «إبتسام» صاحبها لما اتصلت تسلم عليها، ف جأة يا اخويا إتحول «سى أحمد» لإنسان تانى خالص صوته جايب لآخر الدنيا بعد ما كان عامل فيها عبدالحليم حافظ خلال النص ساعة اللي فاتت.

إنتيتكسريكلامى وإحنا لسه مامرش أسبوع على خطوبتنا، مش قولتلكنتطعى علاقتك بكل صاحباتك هو أنا كلاميمايتسمعش ليه؟ النظام ده مش هايمشيمعايا، أنا قولتلكورسيتك على الحوار أول ماتقدمتلك، وإلا يابنت الناس كل واحد فينا من طريق وإحنا لسه فى أولها كدا، أنا عاوز اللي ارتبط بيها تقطع علاقتها بكل الناس اللي عرفتهم قبل ما أدخل حياتها وتبدأ معايا على نضافة، أنا عاوزها تتولد على إيدى من جديد، وبعدين أنا هسكت دلوقتي وليكى أهل يترد عليهم.

ولامؤاخذه هو إنت كدا سكت ياسى أحمد أو مال لو إتكلمت هتعمل إيه؟ ده إنت فرجت الميكروباص كله على إسم النبى حارسها مروة ولا أنت مش واخذ بالك؟! العجيب فى الموضوع إن «مروة» فضلت ساكته طول فترة الرده اللي قام بيها أحمد وماكانتش عارفة تلملم نفسها لدرجة إن كان نفسها الارض تنشق وتبلعها من كسفتها قدام الناس اللي راكبين الميكروباص، دى ما فتحتش بوقها غير لما سكت خالص وكانت بتحاول تطيب

خاطره وتحنن قلبه عليها، وبتحاول تقنعه أنه مايكبرش الموضوع ويوصله لأهلها، ووعدته إنها هتقطع علاقتها بكل الناس اللي حوالها ومش هتكسرله كلمة بعد النهاردة.

أنا بصراحة ماستحملتش اللي بيحصل ده وإنتهزت فرصة إنشغال «أحمد» باتصال جاله من صاحبه بيعزمه فيه على فرحه، ييجى واحد دلوقت يقولى وعرفتى منين إنه كان بيكلم صاحبه.. هقولكسى أحمد صوته مش محتاج ميكروفون، المهم ياخويا سألت مروة إنتى إيه اللي خلاكى توافقيه وتوعيده إنك هاتقطعي علاقاتك بكل الناس اللي تعرفيهم؟ ردت عليا وقالتلى أمى نبهت عليا أسمع كلامه فى كل حاجه وماعارضوش، ده أنا ماصدقت حد إتقدم لى ما إنتى شايفة سوق العرسان شاحح اليومين دول، ولا مؤاخذة الصحاب بتروح وتيجى يعنى مش هابوظ الجوازة علشان الناس، ماهو برضه بيعغير عليا.

الحقيقة أنا كنت متعاطفة جدا معاها فى الأول بس بعد ماسمعت اللي قالته قررت أنزل فى أقرب محطة وأكمل مشوارى فى ميكروباص تانى بسبب حالة الاستفزاز والاحباط اللي حصلت لى بعد إجابتها دى.

ركبت ميكروباص تانى وقعدت جنب الشباك والمرة دى بدل ما ابص عالطبيعة وأطير بجناحاتى، عقلى بدأ يودى ويجيب فى الموقف اللي حصل لى وفى كلام مروة اللي رجعت تصعب عليا

تانى ماهى فعلا هاتعمل إيه يا حبة عيني ديلا حول لها ولا قوة
خطيها بيهددها وأمها مأكدة عليها متكسرش له كلمة وكمان
سوق العرسان شاحح، ما لازم ردها عليا يبقى كدا.

بس السؤال هنا: إنتى إزاي مافهمتيش إن دى مؤشرات
خطيرة؟!، ماهوزى ما أجبرك تقطعى علاقتك بصحباتك
هايجبرك بعد الجواز تقطعى علاقتك بأهلك يا خايبة، هيقولك
بالاش تزورى أمك، وماتوديش أخوكى ولا له لزوم تحضرى
سبوع بنت أختك، المؤشرات كلها واضحة وبتوافقيه وإنتى
مغمضة عينكى، طيب مأخديش بالك إنه لسه محتفظ بصحابه
وماقطعش علاقتة بيهم.

بقولك إيه ياسى أحمد لو فى واحدة من صديقات خطيتك
حصل منها موقف ماعجبش سيادتك، خليها تقطع علاقتها
بالشخصية دى بس بعد ماتناقشها طبعاً فى اللى صدر منها
مايكن إنت اللى فاهم غلط، مش تطلب منها تقطع علاقتها بكل
الناس.

وبعدين إيه تشكلها على إيدك دى؟! هى حته صلصال
هتعملها ست من أول وجديد؟ ولما أنت مش قادر تحترم
أداميتها فى فترة الخطوبة هاتعمل معاها إيه بعد الجواز؟! التحكم
غير السوى ده عمره مايبنى علاقة سليمة ياسى أحمد، والليبتعمله
ده دليل واضح جدا على عدم ثقتك بنفسك.

أقولك على حاجة روح أهل نفسك الأول وبعد كدا تعالى
إتقدم لبنات الناس، وماتبقاش أناى تحتفظ إنت بكل حياتك
وتجبر خطيبتك إنها تلغى حياتها كلها علشانك، وإنتى ياست
مروة إتلحلى كدا وماتوافقيش عالغلط لمجرد إن سوق العرسان
شاح، ده اللى عنده صاحب «وفى» اليومين دول ييمسك فيه
بإديه وسنانه

◀ (راجلك نص لبة) ▶

طول الطريق وهى بتكلم نفسها وبناتها فى حضنها قافلة عليهم
بيديها الإتين بقوة وعلى وشها علامات رعب شديد وجسمها
كله بيتنفض وهاتك يابكاء.

النهاردة ركبت الميكروباص و كلي أمل فى قاعدة رايقة هادية
على الكنبه الأخيرة جنب الشباك، والمرة دى قررت ألبس
السماعات فى ودانى واسمع «الست وردة» وأطير وأررف مع
كلمات أغنيتهما وأنجو بنفسى من الوقوع فى فخ التدخل فى
الحوارات الجانيبة اللى بتحدث فى الميكروباص. للأسف رعشة
جسم «الست عايده» ووضعها المحزن كانوا أقوى من إنى
أستسلم لحالة الإستمتاع اللى كنت عاوزة أعيشها، وبكل هدوء
سألته مالك؟ فيكى إية؟، ردت عليا وهى بصة قدامها وصوتها
مخنوق وقالتلى: طردنى أنا والبنات من البيت فى نص الليل،
قالى مش هاتقعدى فيه تانى، طردنى بهدوم البيت، مآثرش فيه

خوف بناته وهو نازل فيا ضرب، طردنا وماخافش عليا ولا على بناته، قعدنا قدام البيت فى نص الليل وإحنا مرعويين وصوت بكاء بناتى وصل للجيران، لولا الست جميلة إلهى يسترها دخلتنى عندها أنا والبنات وسترتنا للصبح ما كنتش أعرف إيه اللى ممكن يحصل لنا

فى حالة من الإنهيار التام كملت الست عايده كلامها، والمرة دى قررت تبص لى وقالت لى، شوفتى إنتى زعلتى إزاي على حالى يا أبله، أنا بقى أهلى مايبز علوش على حالى كل مرة يعمل فينا كدا وأروح لهم مطرودة يرجعونى تانى ويقولولى الست مالهاش غير بيتها، هو فين بيتى اللى يقولوا عليه ده والنبي يا أبله؟ أنا المرة ديرا جعلهم مطرودة نص الليل ولولا جارتى كان يا عالم إيه اللى حصلي أنا والبنات، ادعيلي يا أبله أصعب على أهلى المرة دى وما يرجعونيش وياخدو لى حقى منه. وصلنا للمحطة الأخيرة اللى كلنا هننزل فيها ولقيت الست عايده بتقولى هو الراجل اللى يطرد مراته وبناته فى نص الليل يتأمن عليهم تانى؟، ادعيلي يا أبله إن ربنا يقف جنبى هو اللى هاينصفنى. مشيت وأنا كلى حزن على عايده اللى رايحة لأهلها وهى فاقدة الأمل في مساعدتهم ليها، وكل اللى كان نفسى فيه إنهم يفوقوا المرة دى وينصفوها وياخدولها حقها من جوزها معدوم الإنسانية اللى طردها من البيت فى نص الليل.

مشاكل البيوت مابتتهيش وياما فى بيوت مقفول عليها كثير،
والخلافات بين الراجل ومراته مابتخلصش، بس اللى المفروض
يخلص وينتهى هو قلة الرجولة، يعنى مافيش راجل عنده نخوه
يطرد مراته وبناته فى أنصاص الليالي، أعتقد إن كذا الموضوع
خرج عن إطار الرجولة.

﴿ هَاتِي عَى بِنْتِكَ بِكَام يَا ناصِحَة؟! ﴾

احلمى إنتى بس وهو لازم يحقق، ماتخليش في نفسك حاجة اطلبى منه كل اللى تحتاجيه، أو مال إيه! ما إنتى ملزومة منه دلوقتى، خليكى ناصحة زى أمك ماتبطلش طلبات علشان مايلحش ياخذ نفسه، من ناحية يحققك كل أحلامك ومن ناحية مايصش لحد غيرك يا عين أمك.

فاكرة يابت التليفون اللى قولتلى إنه عاجبك أطلبيه منه، والخاتم اللى شوفناه عند الجواهرجى الأسبوع اللى فات خليه يجبهولك هدية في الفلاتين اللى بتقولوا عليه ده، والفستان اللى كان نفسك تحضرى بيه فرح بنت خالك لازم هو يشتريه، والشقة يا حبة عينى لازم يجييلك شقة ماجتش لبنت من بنات العيلة كلها ماهو بقى «خطيبك» وطالما اتخطبتوا لازم يبقي مسؤل عن كل اللى تحتاجيه ومايخليشفى نفسك حاجة أبدا، وأوعى يابت يضحك عليكى ويشغلك اسطوانات الفقر، ساعتها بقى تنكدى

عليه لحد مايجيب لك اللي إنتى عاوزاه، إنتى مش أقل من بنت خالتك سهير وبنت عمك سعاد.

الست ناصحة نجحت إنها تخرجنى عن شعورى وتخلينى ألعن الحظ اللى قعدها جنبى هي وبتتها «الخايبة» اللى ما عندهاش مخ فى الميكروباص، ياخويا من ساعة ما ركبنا والست مش ساكتة كلت دماغ البنت من كتر الرغى فى الكلام الفاضى ده، بدل ماتنصحها تتعامل إزاي مع خطيها وتعلمها الأصول، بتقولها نكدى عليه لو مانفذش كل طلباتك، اللى حرق دمي وإستفزنى أكثر رد «بنت الست ناصحة» اللى كان عبارة عن حاضر وعندك حق ياماما.

ماكذبش عليكم ما حستش بنفسى غير وأنا ناطة فى الحوار وما سكتش غير لما إديت الست ناصحة وبتتها درس فى الأصول، وكان عندى أمل طبعاً أنهم يتكسفوا على دهم ويرجعوا عن الأفكار السودا اللى هتبوظ الجواز دى، لكن الحقيقة «الست ناصحة» ردها صدمنى لما قالت «اللى مامعوش ما يلزموش يا حبيبتى» وأنا بتى يتمناها ألف راجل، وإذا ماكنش خطيها يحقق لها كل أحلامها يبقى مايلزمناش هو وجوازته، وخليكى فى حالك إنتى.

طبعاً أنا بعد ما سمعت البوق ده من «الست ناصحة» واللى قالت هولى وعلى وشها كل معالم الشر الليفى الكون، رجعت تانى وأخذت وضعى على الكرسي بتاعى وبصيت من الشباك بس

المرّة ديمقدرتش أستمتع بالطريق وعقلي فضل يودى ويجيب فى كلام الست دى ونصايحها، واللى إستفزنى أكثر وخلاى أنزل من الميكروباص قبل المحطة بتاعتى إنها لسة مكلمة فى نصايحها لبنتها وماتكسفتش بعد الكلام الليسمعته منى .

نزلت من الميكروباص وقررت أتمشي فى الشارع وأشم شوية هواء يمكن أنسى «الست ناصحة وكلامها» اللي يسد النفس، بس الحقيقة مقدرتش وسألت نفسي هي ليه أعتبرت خطيب بنتها مصباح علاء الدين أو الفانوس السحريالليهايحقق لها أحلامها؟!، فين أيام ماكننا بنسمع جملة «إحنا بنشتري راجل» خلاص يعنى الكلام الحلوده مابقاش له وجود، ودلوقتى بقي اللي مامعوش مايلزموش، حولتى الموضوع كله «ياست ناصحة» لسبوبة كل اللي همك إنتى وبتتك تخلصوا على الراجل وفلوسه، يعنى بدل ماتعقلي بتتك تقويها وتشجعها عالغلط، بدل ماتنصحهاباللى يهدى سرها تقولي لها نكدى عليه لو مانفذش طلباتك، فين أيام ماكنت الأمهات بتقول لبناتها إحنا عاوزين راجل يصونك مش راجل معاه فانوس سحرى .

بقولك إيه «ياست ناصحة» علمى بتتك الرضا باللى ربنا قسمهولها، علميها إزاي تتعامل مع الراجل اللي هايبقي جوزها بالأصول والأخلاق، علميها يعنى إيه جواز ومسؤولية بدل ماتعلميها الطمع وقلة التقدير .

◀ (طلاق بالرز أبولبن) ▶

طبعاً كلنا عارفين أن «الأرز باللبن» ماينفعش يتقاوم أبداده حاجة كدا كلنا متفقين على حبها وسط حاجات كتير قوى مختلفين عليها على طول، خصوصاً بعد طبق كشرى مُعتبر، بيتقى الأرز باللبن ده عامل زى المكافأة اللي بتأخذها بعد انجاز عظيم، بس ماحدث فينا كان عمره يتخيل انه هايبقى السبب فى طلاق سعيد وحنان.

الواقعه دى حصلت فى اليوم اللي كانت حنان راجعة فيه من البلد بعد زياره طويلة لأمها العيانه، دخلت البيت بعد مشوار سفر كله معاناه وارهاق، على أمل إنها واحشة جوزها وولادها، ومتخيلة إنهم ماكانوش قادرين يعيشوا من غيرها الفترة اللي غابت فيها عنهم، وللأسف دى كلها كانت عبارة عن خيالات فعلاً موجودة بس فى دماغ حنان.

اتفاجئت حنان إن الاستقبال كان كله برود ومافيهوش أى فرحة برجوعها، قررت حنان وقتها إنها تقوم بعملية الترحيب بنفسها،

طبعاً ولادها وجوزها واحشيتها جدا ومفتقداهم بقالها فترة، جريت حنان على أوضة ولادها مها وعبدالرحمن وهي بتقولهم وحشتوني قوى يا ولاد بنظرة باردة كان ردهم إنتى جيتى ياماما والنبي فى غسيل كتير عاوزينك تغسله لنا حالا هدومنا كلها مش نظيفة، ورجعوا بلا مبالاة شديدة يكملوا لعب عالموبايل بدون أى اهتمام لمشاعر أمهم الملهوفة عليهم، واللى لسه راجعة من زيارة أمها المريضة.

سمعت حنان صوت جاى من الصالة بيقلها إنتى جيتى ياست هانم؟، ده كان صوت سعيد جوزها اللى كان نايم عالكنبة مريح بعد ما اتغدى هوو والعيال وشرب كوباية الشاى المعتبرة، بكل حب قالتله حنان إزيك ياسعيد وحشتنى قوى إنت والعيال، عملتوا إيه الفترة دى من غيري؟، كنتوا واحشنى قوى، مش عارفة أوصفلك المدة دى عدت عليا إزاي كإنهم سنة والله، بكل برود قالها طيب قومى اعملى لى «رز بلبن» نفسى هفانى عليه دلوقتى، حنان جالها ذهول من رد جوزها اللى ماكانتش متوقعاه.

يعنى اعمل ايه ياسعيد؟ أصوت والم عليا الناس؟ رز بلبن إيه دلوقتى؟ ده انا لسه راجعة من السفر وماغيرتش هدومى وبقولك واحشنى إنت والعيال تقولى رز بلبن ونفسى هفانى عليه، طيب

هاعملهولك بكرة إن شاء الله حتى عالأقل أكون ريحت شوية
حرام عليك ياأخي أنا لسة راجعة ومش قادرة أصلب طولى.
بكل تحدى رد سعيد، لأ.. دلوقتى أنا عاوز أكله دلوقتى.

وبصوت كله قسوة رد على مراته الغلبانة اللي لاحول لها
ولا قوة، وقالها عليا الطلاق بالثلاثة لومافزيتى عملتى الرز
بلبن دلوقتى لترجعى لأمك اللي كنتى عندها دى مطلقة، حنان
فى ذهول، إنت بتقول إيه ياسعيد؟!، هاتطلقنى علشان رز
بلبن؟!!!.

كان رد سعيد أكثر صدمة من الردود اللي فاتت، أو مال إنتى
دورك إيه هنا، إنتى تنفذى اللي اطلبه منك، وماتعترضيش،
شغلانتك هنا إنك تخدمينى أنا وعيالى، شاطرة بس تروحي
تخدمى أمك، يا شيخة كنا مراتاحين من غيرك.

فى الوقت ده انهارت حنان وقالتله بكل قوة، أنا مش شغالة
ياسعيد تنفذلك اللي إنت وولادك تطلبوه زيمًا بتقول .. أنا أم
وزوجة مش شغالة.

عمنا سعيد خدته الجلالة شويتين، وصمم على اللي قاله،
لأ.. شغالة يا حنان، وفعلا رمى عليها يمين الطلاق وقالها إرجعى
بقى عند أمك وقوليها أنا أطلقت علشان مسمعتش كلام جوزى،
وما عملتلوش رز بلبن.

ماتستهدى بالله شوية ياعم سعيد كدا وروق، رز بلبن إيه اللى
طلقت مراتك علشان.

لما تيجى تتلكك، اتلكك على سبب أكبر من كدا شوية علشان
الناس ماتكولش وشك.

حنان دى مراتك فعلا لو مش مصدق دى حاجة ترجعلك مش
«شغالة» ياعديم الاحساس، دى زى ماقاتلك إنها أم وزوجة، يعنى
انسانة عندها طاقة وقدرة على التحمل.

لما عملت عليها راجل قوى كدا، واستخدمت صلاحياتك
وظلقتها علشان الرز باللبن كنت بتعاقبها على إيه بالضبط؟ دى
حتى كانت بتزور أمها المريضة وتخدمها فى مرضها علشان
تكسب رضاها وربنا يباركها فيك وفى ولادك .

كانت بتصل الرحم، اللى ربنا -عز وجل- وصانا عليه كانت
قاعدة تحت رجلين أمها علشان تكسب رضى ربنا

مراتك مش شغالة ياعم سعيد، مراتك بتعمل كل حاجة ليك
ولعيالك بدافع الحب والمسؤولية، المسؤولية اللى إنت ماتعرفش
عنها حاجة، لأنك لو تعرفها كنت علمتها لولادك، كنت عرفتهم
إن الأم ليها دور أكبر من الغسيل والطبخ وخدمة الكبير والصغير،
كنت هاتريهم على إن الأم هى البيت، الدفء الاطمئنان الأحتواء،
الحاجة الحلوة اللى مجمعانا كلنا.. اللى فى عز تعبها ووجعها
ومرضها شايلانا كلنا

ياأبو الرجولة، ياللى طلقت مراتك علشان معملتش رز بلبن،
أكيد إنت أصغر من إنك تعرف تحافظ على بيت وزوجة وأسرة،
أكيد إنت ماتفهمش يعنى إيه تتططب على مراتك وقت تعبها
مش تمارس عليها رجولتك المصطنعة وتعاقبها علشان طولت
شوية عند أمها المريضة اللي مالهاش غيرها .

حنان مش شغالة ياسعيد .. عزيزتى حنان ماتندميش على
طلاقك من سعيد لما يكون بهذه العقلية.

ياترى فى حياتنا كام حنان كاتمة وساكته علشان المركب
تمشي، وكام سعيد بيتلكك لحنان ويبقف لها عالهايفة ومتصدر.

﴿أنا عاوزة مشاعر يا عبدالمطلب﴾

قامت خناقة كبيرة بين الأستاذ عبدالمطلب والست مشاعر مراته لما قررت تسأله السؤال اللي لو اتسأل لأى راجل اليومين دول هايتعامل معاه على إنه نوع من أنواع قلة العقل والعكننة «ألاقوللى هو أنت مابقتش تقولى كلام حلوزى زمان ليه؟» وده حصل لما الست مشاعر حست إنه بقاله فترة كبيرة ما يبعرش لها عن حبه ومشاعره، وإن العلاقة بينهم بقت عاملة زى اتنين موظفين كل واحد فيهم بيقوم بدوره المخصص له على أكمل وجه من دون أى مشاعر.

طيب أنا معاكى جداً ياست مشاعر فى اللي بتقوليه، ومتفق معاكى تماماً لأن الموضوع مهم وخطير وبرافو عليكى إنك بتسأللى عن الحاجات اللي بتغذى روحك، وأكيد الأستاذ عبدالمطلب يستاهل العتاب والعقاب، بس مش فى الميكروباص ياست مشاعر، بينى وبينكم أنا خلاص فقدت الأمل إنى أعرف أمارس طقوسى فى الميكروباص، صقوسى البسيطة جداً اللي

هى عبارة عن إنى أقعد على الكنبه الأخيرة جنب الشباك وأبص منه وأطير وأرفرف فى الفضاء، وكل مرة أحاول أعمل كدا يركب جنبى اثنان ما بيحبوش يتناقشوا فى مشاكلهم الشخصية ويحلوها غير فى الميكروباص .

طبعًا صوتهم كل مادا بيعلى وأنا ماسكة نفسى ومحافظة تمامًا على ثباتى الانفعالى وقررت إنى ما أدخلش نفسى فى الموضوع، وبصيت تانى من شبك الميكروباص وحاولت أرفرف فى الفضاء، وإذا بالست مشاعر بتقولى ما تحضرينا يا أبله، تقولش ياخويا لما صدقت وكأنى كنت مستنية اللحظة دى وعينك ما تشوف إلا النور، دخلت فى الراجل شمال وهاتك يا تأنيب وعملت فيها مستشارة علاقات زوجية والمدافعة عن حقوق مشاعر الستات، لدرجة إنى شوية كدا وكنت هاديله دروس فى الأخلاق، ما أكذبش عليكم الجلالة خادتنى وإذا بالأستاذ عبدالمطلب بيقولى كفاية يا أبله رعى من حقى أنا كمان أدافع عن نفسى، بكل حماس منى وبما إنى اعتبرت نفسى المسئولة عن إدارة الحوار وإيجاد حلول للمشكلة، قوت له اتفضل سمعنى دفاعك عن نفسك ما هو الراجل والنبي عنده حق اتنين ستات ماسكينه كلام ومش عاوزين يسمعه ولا يدوله فرصة يتكلم .

رد الأستاذ عبدالمطلب فاجئنى الحقيقة خلانى أقول فى عقل بالى يا أرض انشقى وابلعينى لما قالى اسألها كدا آخر مرة

قولتلها وحشتيني كان ردها إيه؟! فاكرة يا مشاعر ولا أفكر،
قالتلى وحشتك إيه ياراجل فين «اللحمة» اللى طلبتها منك قبل
ما تنزل، فاكرة ولانسيتي، ودلوقتي جاية تحرجيني قدام الناس
وتسأليني أنا ليه ما بقولكيش كلام حلو، والنبي ردى أنتى عليها يا
أبلة وقولى كلمة حق.

أرد أقول إيه، أنا كان مالى ومال مشاكل الناس أهو فضولى ده
هو اللى هايجبلى الكافية، قولت فى بالى أنزل من الميكروباص
وأهرب من الموقف البايخ اللى حطيت نفسى فيه ده بحجة إن
المحطة بتاعتى جت، وأسببهم هما يحلوا مشاكلهم، ما هو على
رأى المثل يا داخل بين البصلة وقشرتها ما ينوبك إلا ريحتها، وأنا
مش عارفة أحداث الموضوع هتوصل معاهم لحد فين وبصراحة
مش عاوزة قلة قيمة.

نزلت فعلاً من الميكروباص وأنا بالى مشغول بالمعركة
الطاحنة اللى دارت بين الأستاذ عبدالمطلب والست مشاعر،
وطول الطريق بسأل نفسى ليه ستات كتير بيتعاملوا مع المشاعر
حسب احتياجهم لها فقط يعنى طول ما هى مشغولة بيبتها
وأولادها أو فى الشغل لا تقبل أى مشاعر ولا حتى بتدور عليها،
ولا بتهتم كمان بمشاعر الطرف الآخر وبتعتبرها كلام فاضى
مالوش لزوم فى الحياة الزوجية اللى بقت فيها حاجات أهم
بكتير من المشاعر والكلام الحلو؟!!

وليه بقينا نشوف ستات كتير ما بتعترفش بالفكرة من الأساس،
وبتعتبر إن المشاعر الحقيقية فى الأشياء المادية وتلبية احتياجاتها
واحتياجات بيتها.

وفجأة كدا فوقت لنفسى وقولت أنا ليه جاية قوى كدا على
الستات ما هو فى رجالة كتير بتعامل مع مشاعر زوجاتها على
إنها تلبية للإحتياجات المادية فقط، وطالما البيت مش ناقصه
حاجة يبقى هو كده عبر عن مشاعره بكل صدق وإخلاص، وإن
المشاعر دى حاجة تافهة مش مطلوبة فى الحياة الزوجية يعنى
كماليات لا بتقدم ولا بتأخر.

الكلمة الحلوة ممكن تحبى علاقة كانت على وشك الموت
والفشل والتعبير عن المشاعر مش كلام فاضى ولا قلة عقل ده
فى بيوت بتتخرب نتيجة قلة التعبير عن المشاعر، أقولك على
حاجة سمعى جوزك كلام حلو وحسسيه دايمًا إنك بتحبيه
وإنك واخدة بالك من إحساسه علشان ما تندميش لما يروح
يدور عليه بره مع ست تانية بتسمعه كلام حلو، وأنت كمان
حسسه كل يوم بمشاعرك واوعى تهمل الجزئية دى علشان
أنت كمان ما تندميش.

للأسف مازلنا نتعامل مع الزواج على إنه نهاية قصة الحب
وبداية لمسئوليات صعبة لا وقت فيها للمشاعر أو التعبير عنها،
لأننا كمان اترينا على إن التعبير عن المشاعر يقلل من قيمة

الشخص، وكل ما يكون تقيلاً وبخيلاً فى مشاعره الطرف الثانى هيجبه أكثر.

المشاعر مش إنك تملى الثلاجة لحمة وفراخ وتدفع مصاريف مدارس العيال وتبقى كدا عملت اللى عليك، دى مشاعرك أنت اللى بتريح بها دماغك، ولا هى الاهتمام بس بالأكل والشرب والغسيل يا فالحة زى ما إنتى فاهمة.

الحياة صعبة؟: أيوه

المسئوليات كتيرة؟: طبعاً

بس «الكلمة الحلوة» الحنينة بين الزوجين هى اللى بتخلى «المركب» تفضل مكلمة لآخر رغم كل العواصف اللى بتحصل فى كل البيوت.

لا تستهينوا بالمشاعر، ولا تقللوا من قيمتها، وما تضعوش عمركم فى الجرى ورا كل الحاجات الليتنسيكم تعيشوا حياة حلوة.

﴿ مالك يا اسطى ﴾

العواف عليكم

(مالك يا اسطى)

يعنى إيه بنت أو ست تقول (مالك يا اسطى) أو (اشطه يازميلي) أو (إيه ياشبح) أو (عاش ياوحش) وفى طبعًا ألفاظ ومصطلحات تانية مش هاينفع أقولها نظرا لأنها تعدت كل الخطوط

يعنى ايه البننت تبقي واقفة قدامك بتتفاخر بأنها تقول ألفاظ وعبارات الراجل أحيانا يتكسف يقولها، جامدة انتى كدا يعنى؟، غرضك إيه يعنى تتفاخرى بأنك ست أو بنت روشة، ولا عاوزة تبينى إنك شبح وماحدش يقدر يبجيجنبك

إزاي ياجماعة ابقى واقفة اتكلم مع بنت أو ست، وحاسة إن من طريقة كلامها وحركاتها هاتطلعى موس من بوقها، هى الأنوثة راحت فين، وإيه اللى وصل بناتنا وستاتنا للمستوى ده من الكلام والحركات والتصرفات

بنت أو ست يعنى رقة يعنى تختاري ألفاظك بعناية، يعنى تحافظى على شكل وشك وانتى بتتكلمى، يعنى تفكرى فى الكلمة قبل ماتقولها.

نيجى بقى للبنات والستات على (التيك توك) والتيك توك ده لوحده كارثة من كوارث السوشيال ميديا، كل البنات والستات اللى بيعملوا فيديوهات عليه طالعين بلطجية، سواء بالأغاني أو بالحركات، أتحداك تلاقى بنت أو ست بتعمل فيديو مثلا بأغنية رومانسية حلوة أو بتعامل بأنوثتها، ألا كلهم ياخوانا طالعين يرقصوا بسنج ومطاوى وعلى أغاني مهرجانات

ماهو للأسف كدا انتى وقفتى فى النص وبقيتى ينطبق عليكى لقب (يا واد يابت) يعنى بنت فى شهادة الميلاد، وتصرفاتك وشكلك ولبسك تصرفات راجل.. وياريته راجل محترم.

فى واحدة هناك اعترضت واتضايقتو بتقوللى ما هو مجتمعك.. وازدياد حالات العنف والتحرش ضد المرأة، هياللى خلتننا نتقمص أسلوب الراجل، وطريقة كلامه وتصرفاته، هرد عليكى حالا وأقولك إنفى فرق بين إنك تبقي ست أو بنت جادة، فى تصرفاتك وفى محتوى كلامك وفى مكان شغلك، وبين أنك تقلبي سرسجية وتتفاخرى بالفاظ وإيحاءات إباحية وتقولى ده كلام رجالة، ياحلوة إنتى وهى فى رجالة بتتكسف منك ومن طريقة كلامك أصلا.

استعيدوا أنوثتكم واحترامكم بقى وبلاش قلة قيمة وقلة أدب.

◀ مالك يا ست قادرة؟! ▶

قررت بينى وبين نفسي اتفاعل مع الناس اللي بتركب جنبي فى الميكروباص كل يوم، قولت فى عقل بالى يابت خلى التفاعل معاهم برضاكى بدل مايبقي غضب عنك زى كل مرة، وسيك بقي من حلم إنك تقعدى جنب الشباك وتبصى للسما وتطيرى وترفر فى شيلى الموضوع بقى من دماغك وركزى مع الناس اللي حواليكى شوية يمكن تبقي سبب فى حل مشكلة، أو تغيرى وجهة نظر شخص من اللي بيقوا قاعدين جنبك فى موقف من المواقف، قررت القرار ده وقاصدة به المساعدة، أصلك ياخويا ماتعرفش إن ساعات كتير قوى بيقى فى إنسان مستنى الكلمة اللي يغير بيها من نفسه سواء من قريب أو بعيد.

كالعادة بحب أقعد على الكنبه الأخيرة فى الميكروباص جنب الشباك، وطبعاً بعد ماقررت إنى أساعد أى شخص محتاج مساعدتى حتى لو بالكلمة من الناس اللي بتبقي قاعدة جنبي،

محاولات كثيرة من إقتحامى لأموهم اتقابلت بانظرات يتقالي فيها وإنتى مالك ياست إنتى ماتخليكى في حالك ، لحد ماحصل الموقف اللى خلانى ماقدرتش أمسك نفسى .

الست «قادرة» والست «نادية» طلعا قعدوا جنبى فى الميكروباص وكل واحدة فيهم على رجليها «عيل»، الست نادية الحقيقية كان وشها سمح حبتين والكلام ماينا جاب بعضه وطبعا كنت بلعب مع «ياسين» ابنها اللى عنده أربع سنين وكان واضح إنه ذو قدرات خاصة، المهم القعدة والدردشة كانت عال العال لحد ماحصل اللى ماقدرتش أسكت عنه .

ياسين ابن الست نادية ذو القدرات الخاصة كان ماسك فى إيده حلويات وطول ما احنا فى الطريق وأنا ملاحظه أنه بيحاول يلعب ويشد فى عصام ابن الست قادرة وعاوز يأكله من الحلويات اللى معاه، رد فعل الست قادرة كان غريب جدا فى كل مرة يحاول فيها ياسين لمس ابنها، كانت تشده بسرعه وتبعده عنه، لحد ما فى الآخر صرخت فى وش الست نادية وقالت لها لمى ابنك مش عاوزين منكم حاجه إيه القرف ده .

عينك ماتشوف الا النور ياخويا إتفتحت فيها وماسكتلهاش، لما لقيتها زودت فى الكلام وقالت أنا مش عاوزة ابني يلعب مع عيل متخلف ومعاق ذهنيًا، ما حستش بنفسى غير وأنا بقولها الإعاقة دى فى قلبك وعقلك إنتى .

الست نادية إنهارت وكانت ماسكة دمعها بالعافية و كل همها فى الوقت ده تحاول تسيطر على ابنها علشان مايضايقش الست قادرة، الغريب فى الموضوع إنها طلبت من السواق يقف لها على جنب علشان تنزل تركب ميكروباص تانى لإن الولد صمم يأكل ابنها من الحلويات اللى معاه.

كان كل اللى شاغلنى بعد ماالست قادرة نزلت هى وابنها، أطيب خاطر الست نادية اللى مقدرتش تسيطر على دموعها وقالتلى هو إحنا إيه ذنبا ماهو خلقه ربنا أكيد مش هانعترض، إحنا راضين وحمدينه وشاكرينه دى نعمة من عنده، بس الناس مش حاسين وبيتعاملوا معاه على إنه شخص ملوش حق يعيش زيهم.

وصلنا للمحطه اللى بنزل فيهاوسلمت على الست نادية وياسين، وطول ماأنا ماشية بفكر فى تصرف الست قادرة الخالى تماما من الرحمة والأدمية، ولقتنى بدون مااحس بكمل خناقتى معاه فى خيالى وبقولها: ياعمية القلب والنظر إنتى أم المفروض تحسى بغيرك، ابن الست نادية مش ناقص بالعكس، كل الحكاية إنه مختلف عن ابنك وغيره من الأولاد لأن ربنا ميزه عنهم.

بتعلمى ابنك من صغره إنه ياخذ جنب من الأطفال ذوى القدرات الخاصة، طيب ماتزعلش بقه لوإبنك تعرض للتنمر من صحابه لما يعايروا ويقولوا يا «تخين»، أصل ماحدث فينا خالى

من العيوب، مع إن دى مش عيوب، بس اللى زيك هما اللى
خلوا كل ميزة حلوة ربنا خصنا بيها عيوب.

ذوى القدرات الخاصة، مش أراجوزات نلعب بيها أو نتريق
عليها أو نتعامل معاهم على إنهم ناقصين، بالعكس هم أشخاص
مختلفين مميزين لا بد أن نتعامل معهم كما نتعامل مع الأسوياء،
ونصيحة لكل أم زى الست قادرة، علمى أولادك إن كلنا حلوين
وعايشين بنعم ربنا علينا وكل إختلاف فينا ميزة مش عيب،
ومتزعلش ياست نادية بكرا تشوفى ياسين راجل زى الفل.

﴿ تعالوا اتعلموا الحب ﴾

مش بس مراتى دى ست الكل وتاج رأسي، مابحسش بطعم حاجه فى الدنيا غير لما تقاسمنى فيها، لما بتزعل بحس إن الدنيا كلها زعلت وما فيش حاجه فى اليوم بتتقضى، ولما بتضحك الدنيا كلها بتضحك لى، غلاوتها عندى ماتوصفش، سندی فى دنيتى وبثراً سرارى، دعوتها علطول سندانى، كلامها فى وقت الضيق يبجبر خاطر ويطيبه، إنتم فاكرين إن اللى بيعرفوا يحبوا ويقولوا كلام حلوهما المتعلمين بس ده انا حبى للحاجة مراتى لو هافضل أتكلم عنه طول عمرى مش هايفلص.

ده كان جزء من كلام عم أحمد حارس أحد العقارات عن زوجته اللى مر على وفاتها 10 سنين.

عم أحمد حارس أحد العقارات، الرجل الصعيدي الوفى ذوالهيبة، لما هاتشوفة هتلاقيه صارم، صاحب شخصية جادة

تجاوز الستين من عمرة ولسه صاحب الكلمة الأولى والأخيرة
شئون كل اللي حواليه لحكمته ولطبيعة شخصيته القوية.

عم أحمد صاحب الحكاية بيقول، عمري ما حسيت إن الحاجه
مرا تى توفت، هي معايا علطول فى كل وقت وكل مناسبة، وأنا
فرحان وأنا زعلان، حتى وأنا عيان بحس أن روحها جنبى
وواخده بالها منى، لحد دلوقتى مش عارف أقتنع إنها مش
موجوده معايا، ولغاية دلوقتى صورتها اللي إتصورتها فى الحج
معايا، لما بأكل بحطها قدامى كأنها بتأكل معايا وأقعد أكلها
وأحكيها عن الدنيا والحال والعيال، وأخر الليل أعمل الشاى
ونقعد نتفرج على التلفزيون ونضحك أنا والصورة، لحد دلوقتى
لما بنام بصحى على صوتها الطيب الحنين، وكل مناسبة بجيبلها
القماش اللي كانت بتجبه علشان تفصل منه جلابيب لما نقلونى
للمستشفى الشهر اللي فات، روحها كانت معايا هي اللي قوتنى،
كنت بحس بايديها بتطبطب عليه، لما كنت بقول للناس إنها معايا
علطول وماتوفتش خافوا عليه فى الأول افتكرونى أتجننت لكن
بعد فترة إتأكدوا إنى عايش بيها بروحها وبنفسها معايا.

عمرها مازعلت منى ولا أشتكتنى دايمًا كانت مكبرانى، كنت
لما أزعلها تيجى تطبطب عليا وتقولى فضفض ايه اللى مضيقاك
كانت فاهمة وعارفه إن هم الدنيا كبير عليه، وإنى مقدرش على
زعلها.

فى يوم سألتها إنتى مابتر وحيش تشتكىنى لحد من أهلك ليه
لما بزعلك، ردت عليه وقالتلى: إنت أهلى، وإنت أبويا وأخويا
وكل عيلتى، إنت اللى بتمناك من الدنيا، ويوم ماأحب أشتكى
منك هشتكى لىك.

عم أحمد بطل الحكايه الرجل البسيط: بيقول أنا عمرى
ماعاملت مع مراتى على إنها مجرد ست اتجوزتها وهاتبقى أم
ولادى وخلاص، كنت بتعامل معاها على إن هى الدنيا باللى
فيها، هى الحظن الحنين اللى بترمى فيه وقت ماالدنيا بتيجى
عليه، هى اللى كلمة منها كانت بتخلينى أقدر أعافر مع الدنيا
وهوموها، كانت بتقف فى شهرى ولاميت راجل، بعد ماتوفت
أنكسرت حسيت أنى مش هعرف أكمل من غيرها، وكنت دايمًا
أقول لنفسى هيه الدنيا ممكن يبقى ليها طعم من غيرها، بس
كنت لما ببص فى صورتها كانت عنيتها بتظمنى أنها هتفضل
معايا علطول

بطل حكايتنا أكدلنا أنه عمرة ماحس بالخوف غير لما فقد
زوجته خاف من مواجهة الدنيا من غيرها أقال أن مافيش ست فى
الدنيا قدرت تملى عليه وقلبه غيرها، قال أنه حبه وتقديره عمرة
ماهيخلص حتى بعد وفاتها

عم أحمد قادر يكمل حياته لحد دلوقتى علشان حاسس بروح
مراته معاها علطول، وصورتها اللى دايمًا معاها ويكلمها ويحكى لها

وبيشكيلها كل همه هي اللي مصبراه ومخلياها يقدر يعيش الكام
يوم اللي لسه فى حياته من غيرها.

عم أحمد بيقولنا فى حكايته إن يوم ما الصورة اللي شايلها
لمراته تضيع منه، يومها بس حياته فعلا هتنتهى، عم أحمد قال
فى نهاية الحكاياه أن حبه لمراته نعمة كبيرة ربنا رزقه بيها، وإنه
كل يوم بيحمد ربنا ويشكره عليها لأنه كان دايمًا يقول إن
الحب رزق.

تعلموا الحب والوفاء من البسطاء، يامتعلمين يابتوع المدارس
ياللى الجواز بينكم بقى عبارة عن حرب بتستنوا تشوفوا مين اللي
هيكسبها.

تعلموا الحب من البسطاء

◀ الفهرس ▶

- إهداء..... 3
- المقدمة..... 5
- 1- (لم مراتك)..... 7
- 2- (أبوكى مات وشيع موت)..... 11
- 3- (هوانت راجل؟!)..... 15
- 4- (ضربتى جوزك النهاردة؟)..... 19
- 5- (اعملى له محضر)..... 23
- 6- (ممکن تشترولى صاحب؟)..... 27
- 7- (إزى إنسانيتك النهاردة؟)..... 31
- 8- (ماسورة ستات وانفجرت)..... 35
- 9- (هاتتحرش بيها هاتتحرش بيك)..... 39
- 10- (الحقونا بمبيدات حشرية للناس الحشرية)..... 43
- 11- (طلق مراتك هتحبها أكثر)..... 47

- 12- (الحقوا المعلى قبل ما يخلص)..... 51
- 13- (زهقتنى بروح أمك)..... 55
- 14- (سوق العرسان انضرب)..... 59
- 15- (راجل نص لبة)..... 65
- 16- (هاتبيعى بنتك بكام ياناصحة؟!)..... 69
- 17- (طلاق بالرز أبو لبن)..... 73
- 18- (أنا عاوزه مشاعر يا عبدالمطلب)..... 79
- 19- (مالك يا اسطى)..... 85
- 20- (مالك يا ست يا قادرة؟!)..... 87
- 21- تعالوا اتعلموا الحب..... 91